

# S-DU PAO-LO SIA PEH HYI-PAH-LÆ NYING GO SHŮ-SING. 使徒保罗写拔希伯来人个书信

## H. I.

DZONG-ZIN Jing-ming dzæ-ü keh-sing sin-cü-nying yüong hyü-to fông-fah le-ts' wô hyiang tsu-tsong dao; <sup>2</sup> tao keh-sing kyih-sah-go nyih-ts dzæ-ü Gyi-go Ng-ts wô hyiang ah-lah dao: *Jing-ming* z shih-lih Gyi hao tsih-djôh væn-veh tso ts'æn-nyih, yi z t'ôh Gyi ts'ông-zao t'in-di. <sup>3</sup> Gyi z *Jing-ming-go* yüong-wô sô t'eo-c'ih-go kwông-ts'æ, Jing-ming-go t'i-tsih sô yin-c'ih weh-t'eh-ko-go siang-mao; yiu djün-neng-go 'ao-ling tsih-công væn-veh; kyijün sô-c'ih Zi-go sing-ming gyiang-diao ah-lah-go ze, ziu zo læ *ting* kao *u-dông*, ǵe-nyin Cü-go jing-siu-pin: <sup>4</sup> tseng-jü keh-sing t'in-s, ing-we tsih-djôh keng-kô tseng-djong-go ngæn-deo.

从前神明在于箇星先知人用许多方法屡次话向祖宗道; <sup>2</sup> 到箇星结煞个日子, 在于其个儿子话向阿拉道。神明是设立其好接着万物做产业, 又是托其创造天地。<sup>3</sup> 其是神明个荣华所透出个光彩, 神明个体质所现出活脱过个相貌; 有全能个号令执掌万物; 既然舍出自个性命浼掉阿拉个罪, 就坐来顶高乌荡, 威严主个顺手边。<sup>4</sup> 尊如箇星天使, 因为接着更加尊重个街头。

<sup>5</sup> *Jing-ming* 'o-dzeng teng 'ah-li ih-go t'in-s yiu ka wô, "Ng z Ngô-go Ng-ts, Ngô kyih-mih sang Ng," [S. 2. 7.] wa-yiu, "Ngô we tso Gyi Ah-tia, Gyi we tso Ngô-go Ng-ts" [2S. 7. 14.] ma? <sup>6</sup> [1] Wa-yiu *Jing-ming* ta-leh Gyi Tsiang-ts tseo-tsing shükæn-zông læ z'eo, yiu ka wô, "Jing-ming-go cong t'in-s tu kæ pa Gyi." [S. 97. 7.]

<sup>5</sup> 神明何曾等何里一个天使有介话, 「尔是我个儿子, 我今末生尔」, [S. 2. 7.] 还有, 「我会做其阿爹, 其会做我个儿子」 [2S. 7. 14.] 吗? <sup>6</sup> 还有神明带勒<sup>[1]</sup>其长子走进世间上来时候, 有介话, 「神明个众天使都该拜其。」 [S. 97. 7.]

[1] *Yiu-teh faen*, *Jing-ming* tsæ ta-læ. 有得翻, 神明再带来。(原注)

<sup>7</sup> Kông-tao keh-sing t'in-s z-ka wô, "Gyi shih-lih Gyi-go t'in-s k'o-pi ziang fong, Gyi shih-lih Gyi-go ts'a-s k'o-pi ziang ho-kwông." [S. 104. 4.] <sup>8</sup> Kông-tao Ng-ts yiu ka wô, "Jing-ming," Ng-go zo-we z tao shü-shü-dæ-dæ; Ng sô tsih-công koh-kô-go gyün-ping z <sup>[1]</sup>tsing-dzih-go gyün-ping. <sup>9</sup> Ng hwun-hyi kong-yi, u-su fi-li; keh-lah Jing-ming, ziu-z Ng-go Jing-ming, pô hwun-lôh-go hyiang-yiu fu Ng ko-jü Ng-go cong de-ho." [S. 45. 6, 7.] <sup>10</sup> Yi wô, "Ng, Cü, z ky'i-ts'u lih-ding di-go keng-kyi;

keh-sing t'in yia z Ng ts'ing-siu cü-zao-go. <sup>11</sup> Gyi-lah we mih-diao, tsih-yiu Ng üong-yün dzeng-tong: gyi-lah tu we ziang i-voh ka gyiu-ky'i-læ; <sup>12</sup> Ng we tsih gyi long ziang bao-t'ao ka, gyi ziu we pin-yih: tsih-yiu Ng z üong feh keng-kæ, Ng-go ziu-shü m-neh dzing-gyi." [S. 102. 25-27.]

<sup>7</sup> 讲到箇星天使是介话，「其设立其个天使可比像风，其设立其个差使可比像火光。」 [S. 104. 4.] <sup>8</sup> 讲到儿子又介话，「神明，尔个座位是到世世代代；尔所执掌国家个权柄是正直<sup>[1]</sup>个权柄。<sup>9</sup> 尔欢喜公义，恶慤非礼；箇拉神明，就是尔个神明，把欢乐个香油傅尔过如尔个众队伙。」 [S. 45. 6, 7.] <sup>10</sup> 又话，「尔，主，是起初立定地个根基；箇星天也是尔亲手制造个。<sup>11</sup> 其拉会灭掉，只有尔永远存东；其拉都会像衣服介旧起来；<sup>12</sup> 尔会折其拢像袍套介，其就会变易。只有尔是永弗更改，尔个寿岁旣得尽其。」 [S. 102. 25-27.]

[1] *Peng-veng wô*, dzih-go. 本文话，直个。（原注）

<sup>13</sup> *Jing-ming* 'o-dzeng teng 'ah-li ih-go t'in-s wô, "Hao zo læ Ngô jing-siu-pin, teng-tao Ngô pô Ng-go dziu-dih tso Ng-go dah-kyiah-teng?" [S. 110. 1.] <sup>14</sup> Cong t'in-s ky'i feh-z voh-z *Jing-ming* go ling, *coh-kwun* be ts'a-ky'i we-leh keh-sing tsiang-læ iao tsih-djôh kyi-sing go nying hao tông ts'a-s ma?

<sup>13</sup> 神明何曾等何里一个天使话，「好坐来我顺手边，等到我把尔个仇敌做尔个踏脚凳？」 [S. 110. 1.] <sup>14</sup> 众天使岂弗是服侍神明个灵，只管被差去为了箇星将来要接着救星个人好当差使吗？

---

## H. II.

Sô-yi ah-lah kæ yü-kô liu-sing sô t'ing-meng-go z-ken, k'ong-p'ô 'ôh-tsia <sup>[1]</sup>shih-lôh gyi. <sup>2</sup> Ing-we *Jing-ming* t'ôh-leh t'in-s kông-go shih-wô kyi-jün z ih-ding-peh-yih-go, væn-pah we-nyih feh i-jing z-ken tu iao teh-djôh tsing-dzih-go pao-ing; <sup>3</sup> *hwông-ts'ia* ka do-go kyi-sing, ah-lah ziah feh ky'i ts'æ gyi, dza neng-keo bi-leh-ko ni? Keh-go *kyiu-sing* z t'ôh-leh Cü kông ky'i-deo go, keh-sing t'ing-meng cü-kwu ky'üôh-ky'üôh-jih-jih wô hyiang ah-lah dao; <sup>4</sup> *Jing-ming* tsiao Gyi-zi-go ts-i yüong gyi-z, ziao-deo, yiu-ho 'ao-su jing-tsih, teng <sup>[2]</sup>*Sing-Ling-go* eng-s, dô-kô tso te-tsing.

所以阿拉该愈加留心所听闻个事干，恐怕或者失落其<sup>[1]</sup>。<sup>2</sup> 因为神明托勒天使讲个说话既然是一定不易个，凡百违逆弗依顺事干都要得着正直个报应；<sup>3</sup> 况

且介大个救星，阿拉若弗去睬其，咋能够避勒过呢？箇个救星是托了主讲起头个，箇星听闻主顾确实实话向阿拉道；<sup>4</sup> 神明照其自个旨意用奇事，兆头，有伙号数神迹，等圣灵个恩赐<sup>[2]</sup>，大家做对证。

[1] 'Ôh wô, feh ky'i ts'æ gyi; 'ôh, teng gyi  
ts'ô-k'æ. 或话，弗去睬其；或，等其岔开。（原注）

[2] Peng-veng, 'ôh kông, pô Sing-Ling feng peh nying; 'ôh, Sing-Ling sô feng peh nying go. 本文，或讲，把圣灵分拨人；或圣灵所分拨人个。（原注）

<sup>5</sup> AH-LAH sô kông keh tsiang-læ-go z-shü, *Jing-ming* bing feh-z peh gyi kwe-voh keh-sing t'in-s: <sup>6</sup> dæn-z yiu ih-go nying læ ih-p'in shü-li tso te-tsing, z-ka wô, “Nying z soh-si, Ng we kyi-nyiaen gyi? nying-go ng-ts z soh-si, Ng we tsiao-kwu gyi? <sup>7</sup> Ng z peh gyi pi t'in-s <sup>[1]</sup> dzæn-z siao-tin, yi we peh gyi ta-zông yüong-wô t'i-min-go bing-t'in-kwun, peh gyi công-kwun Ng siu sô zao-go tong-si: <sup>8</sup> Ng we s-teh væn-veh tu kwe-voh gyi-go kyiah-'ô.” [S. 8. 4–6.] Kyi-jün “s-teh væn-veh kwe-voh gyi,” tön m-yiu ih-jiang feh kwe-voh gyi: dæn-z tao jü-kying wa feh-zing k'en-kyin væn-veh kwe-voh gyi. <sup>9</sup> <sup>[2]</sup> Tsih-yiu keh-we “pi t'in-s dzæn-z siao-tin-go” Yia-su, ah-lah k'en-kyin Gyi we-leh si-go kw'u-deo “ta-zông yüong-wô t'i-min-go bing-t'in-kwun,” s-teh Gyi k'ao-djôh Jing-ming-go eng-we hao t'i cong-nying ky'üoh si-go kw'u-deo.

<sup>5</sup> 阿拉所讲箇将来个时世，神明并非是拨其归服箇星天使。<sup>6</sup> 但是有一个人来一片书里做对证，是介话，「人是啥西，尔会记念其？人个儿子是啥西，尔会照顾其？」<sup>7</sup> 尔是拨其比天使暂时小点<sup>[1]</sup>，又会拨其戴上荣华体面个平天冠，拨其掌管尔手所造个东西。<sup>8</sup> 尔会使得万物都归服其个脚下。」[S. 8. 4–6.] 既然「使得万物归服其」，断旣有一样弗归服其。但是到如今还弗曾看见万物归服其。<sup>9</sup> 只有箇位「比天使暂时小点个」耶稣<sup>[2]</sup>，阿拉看见其为了死个苦头「戴上荣华体面个平天冠」，使得其靠着神明个恩惠好替众人吃死个苦头。

[1] 'Ôh wô, shü-vi siao-tin. 或话，势微小点。（原注）

[2] 'Ôh wô, Tsih k'en-kyin Yia-su ta-zông yüong-wô t'i-min-go bing-t'in-kwun: Gyi we-leh si-go kw'u-deo dzæn-z pi t'in-s siao-tin-go. 或话，只看见耶稣带上荣华体面个平天冠。其为了死个苦头暂时比天使小点个。（原注）

<sup>10</sup> Væn-veh tu z we-leh Gyi, k'ao-djôh Gyi go, keh-we *Jing-ming*, iao ta-ling hyü-to ng-ts teh-djôh yüong-wô, ziu s-teh gyi-lah teh-kyiu-go Kyüing-wông we-leh kw'u-næn neng-keo djün-be, z ing-kæ-go. <sup>11</sup> Keh-we tseng-ky'i gyi-lah go, teng keh-sing be tseng-ky'i-go, tu z c'ih-ü Ih-we: sô-yi ts'ing-hwu gyi-lah z hyüong-di yia feh we wông-k'ong, z-ka wô, <sup>12</sup> “Ngô we pô Ng-go ming-deo t'ong-pao Ngô-go

hyüong-di; læ kyiao-we cong-nyiang Ngô we ts'ông s tsæn-me Ng." [S. 22. 22.] <sup>13</sup> Yi wô, "Ngô we siang-sing k'ao-djôh Gyi." [2S. 22. 3. S-p'in 18. 2.] Wa-yiu wô, "Ngô teng Jing-ming sô s-peh Ngô go siao-nying tu læ-tong." [Y. 8. 18.]

<sup>10</sup> 万物都是为了其，靠着其个，箇位神明，要带领许多儿子得着荣华，就使得其拉得救个君王为了苦难能够全备，是应该个。<sup>11</sup> 箇位尊起其拉个，等箇星被尊起个，都是出于一位。所以称呼其拉是兄弟也弗会惶恐，是介话，<sup>12</sup> 「我会把尔个名头通报我个兄弟；来教会中央我会唱诗赞美尔。」 [S. 22. 22.]<sup>13</sup> 又话，「我会相信靠着其。」还有话，「我等神明所赐拨我个小孩都来东。」 [Y. 8. 18.]

<sup>14</sup> Keh-sing siao-nying kyi-jün joh-ü nyüoh-sing teng hyüih-ky'i, Gyi-zi yia z-ka dzing we nyüoh-sing teng hyüih-ky'i; iao we-leh *jih-z-kô-go* si hao ba-diao công-kwun si go cü-kwu, ziu-z mo-kwe; <sup>15</sup> yi hao sih-fông keh-sing, we-leh p'ô si, ih-seng tso nu-boh go.

<sup>14</sup> 箇星小人既然属于肉身等血气，其自也是介成为肉身等血气；要为了十字架个死好败掉掌管死个主顾，就是魔鬼；<sup>15</sup> 又好释放箇星，为了怕死，一生做奴仆个。

<sup>16</sup> Gyi bing feh-z læ vu-dzu t'in-s, z læ vu-dzu Üô-pah-lah-hen-go 'eo-dæ. <sup>17</sup> Keh-lah kông-tao Jing-ming z-ken iao tso ih-go dz-pe cong-sing-go Tsi-s-deo, hao wæn-we pah-sing-go ze, li-k'æ teng Gyi hyüong-di yiang-yiang siang-dong. <sup>18</sup> Gyi-zi kyi-jün ziu-ko s-lin-go kw'u-næn, sô-yi neng-keo pông-dzu keh-sing be s-lin-go cü-kwu.

<sup>16</sup> 其并弗是来扶助天使，是来扶助亚伯拉罕个后代。<sup>17</sup> 箇拉讲到神明事干要做一个慈悲忠信个祭司头，好挽回百姓个罪，离开等其兄弟样样相同。<sup>18</sup> 其自既然受过试炼个苦难，所以能够帮助箇星被试炼个主顾。

---

### H. III.

KA-NI, be t'in-zông sô dziao-go sing-jün hyüong-di, yüong ts-si s-ts'eng ah-lah sô tsiao-jing *dao-li* go Ts'a-s teng Tsi-s-deo, keh-we Kyi-toh Yiæ-su: <sup>2</sup> Gyi yiu cong-sing *voh-z* sô shih-lih Gyi go Cü, tsing-ziang Mo-si "læ Jing-ming-go 'eh-kô li-hyang *yiü cong-sing*" ka. [Ms. 12. 7.] <sup>3</sup> Hwông-ts'ia keh-we Yiæ-su sön z k'o-yi teh-djôh yüong-wô ko-jü Mo-si, yiu-ts-wu dzing-kô-go cü-kwu pi gyi ih-kô-go *nying* z

keng-kô kwe-djong. <sup>4</sup> Væn-pah nying-kô tsong yiu ih-go dzing-kô-go cü: ts-ü dzing-dziu væn-veh go, z Jing-ming. <sup>5</sup> Næn-kæn Mo-si tso “nu-boh,” hao te-tsing keh-sing tsiang-læ iao kông go shih-wô, “læ Jing-ming-go ‘eh-kô yiu cong-sing;” <sup>6</sup> dæn-z Kyi-toh tso Ng-ts djü Gyi-zi-go ih-kô yiu cong-sing: ah-lah ziah neng-keo fông-tæn *siang-sing*, kao-hying siang-vông, ih-dzih tao ti kyin-kwu siu-djü, ziu-z Gyi ih-kô-go *nying*.

介呢，被天上所召个圣善兄弟，用仔细思忖阿拉所招认道理个差使等祭司头，箇位基督耶稣。<sup>2</sup> 其有忠信服侍所设立其个主，正像摩西「来神明个合家里向有忠信」介。[Ms. 12. 7.] <sup>3</sup> 况且箇位耶稣算是可以得着荣华过如摩西，犹之乎成家个主顾比其一家个人是更加贵重。<sup>4</sup> 凡百人家总有一个成家个主。至于成就万物个，是神明。<sup>5</sup> 难间摩西做「奴仆」，好对证箇星将来要讲个说话，「来神明个合家有忠信。」<sup>6</sup> 但是基督做儿子治其自个一家有忠信。阿拉若能够放胆相信，高兴想望，一直到底坚固守住，就是其一家个人。

<sup>7</sup> Keh-lah, ziang Sing-Ling sô wô, “Kyih-mih ziah t’ing Gyi-go shih-wô, <sup>8</sup> feh-k’o ngang zi-go sing, ziang zin-deo kyih Ngô ô-wông, læ kw’ông-iæ di-fông s-s Ngô z-’eo ka: <sup>9</sup> ziu-z ng-lah tsu-tsong s-s Ngô, t’en-t’en Ngô, s-jih nyin kong-fu k’en-kyin Ngô sô tso-go z-ken. <sup>10</sup> Sô-yi Ngô k’o-u keh-dæ-go nying, ziu wô, Gyi-lah ih-hyang yiu zia-p’ih-go sing; gyi yia feh sih-teh Ngô-go lu-deo. <sup>11</sup> Ngô ziu dong-nu vah-tsiu, wô, Gyi-lah tsong feh neng-keo tseo-tsing Ngô en-sih li-hyang.” [S. 95. 8–11.] <sup>12</sup> Hyüong-di, yüong kwu-djôh, k’ong-p’ô ng-lah cong-nyiang yiu nying dzeng feh siang-sing hyüong-ôh-go sing, ziu li-k’æ keh-we weh-go Jing-ming: <sup>13</sup> “kyih-mih nyih-ts wa læ-tong, kæ nyih-tang-nyih dô-kô siang-ky’ün; sæn-leh ng-lah li-hyang yiu nying, we-leh ze-nyih-go hong-p’in, pin tso ngang *sing-dziang*. <sup>14</sup> Ing-we ah-lah ziah neng-keo fông-tæn *siang-sing*, s-cong-jü-ih kyin-kwu siu-djü, ziu teng Kyi-toh dô-kô yiu-veng.

<sup>7</sup> 箇拉，像圣灵所话，「今末若听其个说话，<sup>8</sup> 弗可硬自个心，像前头激我慍惶，来旷野地方试试我时候介。<sup>9</sup> 就是尔拉祖宗试试我，探探我，四十年工夫看见我所做个事干。<sup>10</sup> 所以我可恶箇代个人，就话，其拉一向有邪僻个心；其也弗识得我个路头。<sup>11</sup> 我就动怒罚咒，话，其拉总弗能够走进我安息里向。」[S. 95. 8–11.] <sup>12</sup> 兄弟，用顾着，恐怕尔拉中央有人存弗相信凶恶个心，就离开箇位活个神明。<sup>13</sup> 「今末日子还来东，该日打日大家相劝；省勒尔拉里向有人，为了罪孽个哄骗，变做硬心肠。<sup>14</sup> 因为阿拉若能够放胆相信，始终如一坚固守住，就等基督大家有份。

<sup>15</sup> *Zông-veng* sô wô, “Kyh-mih ziah t’ing Gyi-go shih-wô, feh-k’o ngang zi-go sing, ziang *zin-deo* kyih Ngô ô-wông ka.” [S. 95. 8.] <sup>16</sup> Ka-ni, t’ing-meng ts-‘eo kyih Gyi ô-wông cü-kwu z jü ni? ky’i feh-z keng-leh Mo-si tseo-c’ih Yäe-gyih go cong-nying ma? <sup>17</sup> *Jing-ming* s-jih nyin kong-fu k’o-u jü ni? ky’i feh-z keh-sing væn-leh ze, gyi s-siu t’æn læ kw’ông-iæ-li go ma? <sup>18</sup> *Jing-ming* vah-tsiu feh hyü tseo-tsing Gyi en-sih li-hyang go, z jü ni? Ziu-z keh-pæn feh i-jing-go nying. K’o kyin-teh, gyi-lah sô-yi feh neng-keo tseo-tsing z we-leh feh siang-sing-go yün-kwu.

<sup>15</sup> 上文所话，「今末若听其个说话，弗可硬自个心，像前头激我慳惶介。」 [S. 95. 8.] <sup>16</sup> 介呢，听闻之后激其慳惶主顾是谁呢？岂弗是跟勒摩西走出埃及个众人吗？<sup>17</sup> 神明四十年工夫可恶谁呢？岂弗是箇星犯了罪，其尸首摊来旷野里个吗？<sup>18</sup> 神明罚咒弗许走进其安息里向个，是谁呢？就是箇班弗依顺个人。可见得，其拉所以弗能够走进是为了弗相信个缘故。

---

## H. IV.

Ka-ni, tseo-tsing Gyi en-sih li-hyang go ing-hyü kyijün yi-lôh-tong, ah-lah kæ p’ô-gyü, vi-min ng-lah li-hyang yiu nying sön z ts’o-lôh-go. <sup>2</sup> Yiu hao sing-sih djün peh ah-lah, tsing-ziang peh gyi-lah ka: dæn-z sô <sup>[1]</sup> djün-go *en-sih* shih-wô z vu-ih ü gyi-lah, ing-we <sup>[2]</sup> keh-sing t’ing-meng-go cü-kwu m-neh siang-sing-go sing dzeng-tih. <sup>3</sup> Keh-go en-sih li-hyang *tsih-yiu* ah-lah siang-sing-go nying hao tseo-tsing-ky’i; ziang *Jing-ming* sô wô, “Ngô ziu dong-nu vah-tsiu, wô, Gyi-lah tsong feh neng-keo tseo-tsing Ngô en-sih li-hyang:” [S. 95. 11.] jün-r t’in-di zao-dzing ts-‘eo *Jing-ming-go* z-ken yi-kying wun-kong-de. Kông-tao di-ts’ih *nyih* yiu ih-p’in shü z-ka wô, “Jing-ming læ di-ts’ih *nyih* Gyi væn-pah z-ken tu wun-kong, ziu en-sih-de:” [Ts. 2. 2.] <sup>5</sup> wa-yiu zông-veng wô, “Gyi-lah tsong feh neng-keo tseo-tsing Ngô-go en-sih li-hyang.”

介呢，走进其安息里向个应许既然遗落东，阿拉该怕惧，未免尔拉里向有人算是错落个。<sup>2</sup> 有好信息传拨阿拉，正像拨其拉介。但是所传个<sup>[1]</sup>安息说话是无益于其拉，因为箇星听闻个主顾旣得相信个心存的<sup>[2]</sup>。<sup>3</sup> 箇个安息里向只有阿拉相信个人好走进去；像神明所话，「我就动怒罚咒，话，其拉总弗能够走进我安息里向。」 [S. 95. 11.] 然而天地造成之后神明个事干已经完工了。讲到第七日有一片书是介话，「神明来第七日其凡百事干都完工，就安息了。」 [Ts. 2. 2.] <sup>5</sup> 还有上文话，「其拉总弗能够走进我个安息里向。」

[1] *Peng-veng, t'ing-ming-go*. 本文，听闻个。（原注）

[2] *Ôh wô, kông-tao siang-sing-go sing, gyi-lah feh neng-keo teng keh-sing t'ing-meng cü-kwu dô-kô 'eh-long*. 或话，讲到相信个心，其拉弗能够等箇星听闻主顾大家合拢。（原注）

<sup>6</sup> Ka-ni, keh-go en-sih li-hyang tsong yiu nying wa hao tseo-tsing-ky'i; keh-sing sin t'ing-meng keh hao sing-sih cü-kwu we-leh feh i-jing yi feh neng-keo-tseo-tsing: <sup>7</sup> keh-lah læ hyü-to nyin-su ts-'eo læ Da-bih-go *shü-li* yi 'æn-ding ih-go nyih-ts, wô z "kyih-mih;" ziang *zông-veng* sô wô, "Kyih-mih ziah t'ing Gyi-go shih-wô, feh-k'o ngang zi-go sing." [S. 95. 8.] <sup>8</sup> Kyüô-jü <sup>[1]</sup>Iah-shü-üô yi-kying peh pah-sing en-sih, 'eo-deo *Jing-ming* feh we di-ky'i bih-go nyih-ts;—— <sup>9</sup> ka k'en-ky'i-læ, *Jing-ming-go* pah-sing tsong wa yiu ih-go <sup>[2]</sup>en-sih. <sup>10</sup> Ing-we tseo-tsing Gyi en-sih li-hyang go cü-kwu, gyi z zi-go z-ken wun-kong ts-'eo ziu en-sih-go, ziang *Jing-ming* Zi-go z-ken zao-dzing ts-'eo ziu *en-sih* ih-yiang-go.

<sup>6</sup> 介呢，箇个安息里向总有人还好走进去；箇星先听闻箇好信息主顾为了弗依顺又弗能够走进。<sup>7</sup> 箇拉来许多年数之后来大辟个书里又限定一个日子，话是「今末；」像上文所话，「今末若听其个说话，弗可硬自个心。」[S. 95. 8.] <sup>8</sup> 假如约书亚<sup>[1]</sup>已经拨百姓安息，后头神明弗会提起别个日子。<sup>9</sup> 介看起来，神明个百姓总还有一个安息。<sup>10</sup> 因为走进其安息里向个主顾，其是自个事干完工之后就安息个<sup>[2]</sup>，像神明自个事干造成之后就安息一样个。

[1] Iah-shü-üô, YLÆ-SU, *keh liang ming-z peng-veng tsôh tso z-ngæn*. 约书亚，耶稣，箇两名字本文作做字眼。（原注）

[2] *Peng-veng wô, siu en-sih-nyih go z-ken*. 本文话，守安息日个事干。（原注）

<sup>11</sup> Sô-yi ah-lah yüong zông-kying gying-lih tseo-tsing keh en-sih li-hyang, k'ong-p'ô yiu nying k'en keh-cong-ka <sup>[1]</sup>feh i-jing-go pông-yiang ziu iao tih-tao. <sup>12</sup> *Jing-ming-go* shih-wô z ling-weh, yiu neng-ken, kw'a-jü ting fong-li-go pao-kyin, we c'oh-tsing p'o-k'æ weh-ling teng ling-sing, gao-kwu teng kweh-si, yi we bin-c'ih sing-li-go s-nyæn teng ts-hyang. <sup>13</sup> Gyi sô zao-go, yia m-yiu ih-yiang læ Gyi min-zin neng-keo ing-mun: væn-veh læ Gyi ngæn-zin tu c'ih-lu-lu, ming-ming pa-tong; Gyi ziu-z kyih-sön ah-lah tsiang go Cü.

<sup>11</sup> 所以阿拉用上紧勤力走进箇安息里向，恐怕有人看箇种介弗依顺个<sup>[1]</sup>榜样就要跌倒。<sup>12</sup> 神明个说话是灵活，有能干，快如顶锋利个宝剑，会戳进破开活灵等灵性，绞股等骨髓，又会辨出心里个思念等志向。<sup>13</sup> 其所造个，也既有样来其面前能够隐瞒。万物来其眼前都出露露，明明摆东。其就是结算阿拉账个主。

[1] Feh i-jing-go; yiu-teh fæn, feh siang-sing-go. 弗依顺个; 有得翻, 弗相信个。(原注)

<sup>14</sup> KA k'en-ky'i-læ, ah-lah kyijün yiu ih-go do Tsi-s-deo, yi-kying kying-ko keh-sing t'in, ziu-z Jing-ming-go Ng-ts Yia-su, kæ kyin-kwu siu-djü *ah-lah* sô tsiao-jing-go dao-li. <sup>15</sup> Hwông-ts'ia ah-lah sô yiu-go Tsi-s-deo tsæ-ve feh neng-keo t'i-liang æ-lin ah-lah-go no-ziah; Gyi yang-yang z-ken be s-lin, ziang ah-lah ka, *tsih-z* m-neh tsao-djôh ze-ky'in. <sup>16</sup> Sô-yi ah-lah yüong fông-tæn tseo-long 'ong-eng zo-we min-zin, hao teh-djôh æ-lin, tsin-djôh eng-we ze-z pông-dzu *ah-lah*.

<sup>14</sup> 介看起来, 阿拉既然有一个大祭司头, 已经经过箇星天, 就是神明个儿子耶稣, 该坚固守住阿拉所招认个道理。<sup>15</sup> 况且阿拉所有个祭司头再膾弗能够体谅哀怜阿拉个懦弱; 其样样事干被试炼, 像阿拉介, 只是旣得遭着罪愆。<sup>16</sup> 所以阿拉用放胆走拢鸿恩座位面前, 好得着哀怜, 占着恩惠随时帮助阿拉。

---

## H. V.

Væn-pah tsi-s-deo tu z dzong nying-go cong-nyiang kæn-shün-c'ih-læ, yi z we-leh t'i nying *voh-z* Jing-ming sô shih-lih-go, hao t'i ze-ôh hyin-zông li-veh teng tsi-z; <sup>2</sup> gyi neng-keo nyün-liang keh-sing feh ming-bah tseo ts'ô-lu go nying, ing-we gyi-zi yia 'o-jün z no-ziah-go. <sup>3</sup> Sô-yi we-leh zi, tsing-ziang we-leh pah-sing, tông-kæ hyin joh-ze-go tsi-veh.

凡百祭司头都是从人个中央拣选出来, 又是为了替人服侍神明所设立个, 好替罪恶献上礼物等祭祀; <sup>2</sup> 其能够原谅箇星弗明白走岔路个人, 因为其自也果然是懦弱个。<sup>3</sup> 所以为了自, 正像为了百姓, 当该献赎罪个祭物。

<sup>4</sup> Wa-yiu keh kwe-djong-go tsih-veng m-nying ken tông, tsih-yiu mong Jing-ming sô dziao-læ cü-kwu, ziang Üô-leng ka. <sup>5</sup> Z-ka Kyi-toh yia m̃-teh Zi t'e-tseng tso tsi-s-deo; z *Jing-ming sô t'e-tseng-go*, teng Gyi wô, “Ng z Ngô-go Ng-ts, Ngô kyih-mih sang Ng.” [S. 2. 7.] <sup>6</sup> wa-yiu bih *u-sen* z-ka wô, “Ng üong-yün tso Tsi-s, tsiao Mah-kyi-si-teh-go pæn-ts'.” [S.110. 4.]

<sup>4</sup> 还有箇贵重个职份旣人敢当, 只有蒙神明所召来主顾, 像亚伦介。<sup>5</sup> 是介基督也旣得自推尊做祭司头; 是神明所推尊个, 等其话, 「尔是我个儿子, 我今末生尔。」 [S. 2. 7.] <sup>6</sup> 还有别乌碎是介话, 「尔永远做祭司, 照麦基洗德个班次。」 [S.110. 4.]



<sup>7</sup> Gyi dzing we nyüoh-sing go z-'eo, ts'æn-nyiaen gyiu-k'eng, ngæn-li beh-c'ih do-do sing-hyang eo keh-we neng-keo kyiu Gyi min-diao si go Cü-kwu; <sup>[1]</sup>we-leh Gyi tseng-kying p'ô-gyü-go sing, *Jing-ming* ziu t'ing Gyi: <sup>8</sup> se-tsih? z-go Ng-ts, Gyi neng-keo i-jing, yia z dzong kw'u-næn li-hyang jih-lin-ko-læ-go. <sup>9</sup> Tao-leh djün-be, ziu tso væn-pah i-jing Gyi cü-kwu üong-yün teh-kyiu-go Cü: <sup>10</sup> z Jing-ming sô ts'ing-hwu z Tsi-s-deo "tsiao Mah-kyi-si-teh-go pæn-ts'."

<sup>7</sup> 其成为肉身个时候，怀念求悬，眼泪涪出大大声响讴箇位能够救其免掉死个主顾；为了其尊敬怕惧个心，神明就听其<sup>[1]</sup>。<sup>8</sup> 虽即是个儿子，其能够依顺，也是从苦难里向习练过来个。<sup>9</sup> 到了全备，就做凡百依顺其主顾永远得救个主。<sup>10</sup> 是神明所称呼是祭司头「照麦基洗德个班次。」

[1] 'Ôh wô, *Jing-ming* ziu t'ing Gyi, s-teh Gyi t'eh-c'ih p'ô-gyü-go sing: 'ôh, *Jing-ming* ziu t'ing Gyi, kyiu Gyi min-diao Gyi sô p'ô-gyü-go z-ken. *K'en* Mt. 26. 37. Mk. 14. 33. I'e. 12. 27. 或话，或话，神明就听其，使得其脱出怕惧个心。或，神明就听其，救其免掉其所怕惧个事干。看 Mt. 26. 37. Mk. 14. 33. I'e. 12. 27. (原注)

<sup>11</sup> KÔNG-TAO Gyi, ah-lah yiu hyü-to næn ka-shih go shih-wô, ing-we ng-lah t'ing-ts z mông-vu-deo-jü-de. <sup>13</sup> Ziah leng z-'eo-go *dziang-kyiu*, ng-lah *nyün* kæ tso sin-sang; næn-kæn wa ky'iah-leh pô Jing-ming tsiao-shü-go ts'u-'ôh dao-li tsæ kao ng; ng-lah yia ky'iah-leh *ky'üoh* na, væn-zih z ky'üoh-feh-læ-de. <sup>13</sup> Væn-pah ky'üoh-na-go cü-kwu feh t'ong-dah kong-yi-go dao-li; gyi z-go siao-nying." <sup>14</sup> Tsihi-yiu <sup>[1]</sup>dzing-nying-tsiang-da-go hao *ky'üoh* væn-zih; gyi kyin-sih we-leh <sup>[2]</sup>jih-lin neng-keo-bin-pih hao-tæ.

<sup>11</sup> 讲到其，阿拉有许多难解说个说话，因为尔拉听仔是茫无头绪了。<sup>12</sup> 若论时候个长久，尔拉原该做先生；难间还却勒把神明诏书个初学道理再教尔；尔拉也却勒吃奶，饭食是吃弗来了。<sup>13</sup> 凡百吃奶个主顾弗通达公义个道理；其是个小人。<sup>14</sup> 只有成人长大个<sup>[1]</sup>好吃饭食；其见识为了习练<sup>[2]</sup>能够辨别好歹。

[1] 'Ôh wô, djün-be-go cü-kwu; *k'en* 1K. 2. 6. H. 3. 15: 'ôh, wun-djün-go; *k'en* Yk. 4. 13. 或话，全备个主顾；看 1K. 2. 6. H. 3. 15。或，完全个；看 Yk. 4. 13. (原注)

[2] 'Ôh wô, jih-kwæn. 或话，习惯。(原注)

---

## HI. VI.

Sô-yi <sup>[1]</sup>dzong Kyi-toh-go ts'u-'ôh dao-li ah-lah yüong *dzin-dzin* tsing-ih tao djün-be-go di-bu: hao-vong tsæ tang ti-ts, *ziu-z* hwe-kæ gyi si-go 'ang-we, siang-sing Jing-ming, <sup>2</sup> *ling-ziu* keh-sing si-li, en-siu-go *li-tsih*, si-nying tsæ weh, yüong-yün p'un-tön, keh-sing dao-li. <sup>3</sup> Ziah-z Jing-ming k'eng ing-hyü, ah-lah pih-ding z-ka tso.

所以从基督个初学道理阿拉用渐渐进益到全备个地步<sup>[1]</sup>。好留再打底子，就是悔改其死个行为，相信神明，<sup>2</sup> 领受箇星洗礼，按手个礼节，死人再活，永远判断，箇星道理。<sup>3</sup> 若是神明肯应许，阿拉必定是介做。

[1] 'Ôh wô, ah-lah hao-vong kông Kyi-toh-go ts'u-'ôh dao-li; hao ky'i kông keh djün-be-go dao-li. 或话，阿拉好留讲基督个初学道理；好去讲箇全备个道理。（原注）

<sup>4</sup> T'ông-jün yiu nying ih-tsao teh-djôh kwông-ming, zông-djôh keh t'in-zông eng-s-go mi-dao, tsih-ziu Sing-Ling-go *ken-dong*, <sup>5</sup> zông-djôh Jing-ming-go hao-hao dao-li teng tsiang-læ z-shü-go neng-ken, <sup>6</sup> 'eo-deo we shih-diao *keh-go dao-li*, tön feh neng-keo tsæ we-sing-cün-i ih-li tso-nying; *keh z* gyi-zi djong-sin ting-sah Jing-ming-go Ng-ts, ming-ming tsao-t'ah Gyi. <sup>7</sup> P'i-jü din-di peh-djông yiu yü ts-jing gyi; ziah fah-c'ih t'u-ts'æn, 'eh-djôh <sup>[1]</sup>nong-fu-go yüong-dziang, z teh-djôh Jing-ming-go tô-hwô: <sup>8</sup> ziah sang-c'ih ts'-bang yia-ts'ao, *ziu iao* be ky'i-diao, gying-wu tsiu-mô; gyi-go kwe-keng z iao me-diao.

<sup>4</sup> 倘然有人一遭得着光明，尝着箇天上恩赐个味道，接受圣灵个感动，<sup>5</sup> 尝着神明个好好道理等将来时世个能干，<sup>6</sup> 后头会失掉箇个道理，断弗能够再回心转意一礼做人；箇是其自重先钉煞神明个儿子，明明糟蹋其。<sup>7</sup> 譬如田地不常有雨滋润其；若发出土产，合着农夫个<sup>[1]</sup>用场，是得着神明个朵化。<sup>8</sup> 若生出刺棚野草，就要被弃掉，近乎咒骂；其个归根是要焮掉。

[1] 'Ôh wô, kang-cong cü-nying-kô-go. 或话，耕种主人家个。（原注）

<sup>9</sup> Ts'ing-æ-go *hyüong-di*, ah-lah se-tsih ka kông, yia jih-we siang-sing ng-lah z kôh-lu-go, tsong hao teh-djôh kyi. <sup>10</sup> Jing-ming tsæ-ve feh kong-dao, mông-kyi ng-lah sô tso-go z-ken, teng ng jing-æ-go lao-loh; ziu-z ng-lah we-leh Gyi-go ming-deo sô hyin-c'ih-go *jing-æ*, su-djông we kong-ing sing-du, *yin-dzæ* dzing-gyi z-ka tso. <sup>11</sup> Ah-lah pô-feh-neng-keo ng-lah kôh-nying tu we hyin-c'ih tso-ying nyih-sing, ih-dzih tao ti toh-jih siang-vông: <sup>12</sup> feh-k'o yia-dæ, *iao* k'en keh-sing we-leh siang-sing jing-næ we tsih-djôh sô ing-hyü cü-kwu-go yiang.

<sup>9</sup> 亲爱个兄弟，阿拉虽即介讲，也实惠相信尔拉是各路个，总好得着救。<sup>10</sup> 神明再膾弗公道，忘记尔拉所做个事干，等尔仁爱个劳碌；就是尔拉为了其个名头所显出个仁爱，素常会供应圣徒，现在仍旧是介做。<sup>11</sup> 阿拉巴弗能够尔拉

各人都会显出做样热心，一直到抵笃实想望。<sup>12</sup> 弗可懈怠，要看箇星为了相信忍耐会接着所应许主顾个样。

<sup>13</sup> Jing-ming ing-hyü Üô-pah-lah-hen z-'eo, ing-we m-yiu keng-kô do-go hao ts-tin gyi vah-tsiu, ziu ts-tin Zi vah-tsiu, wô, <sup>14</sup> “Ngô tsong we do-nyiang coh-foh ng, do-nyiang c'ông-zing ng-go *ts-seng*.” [Ts. 22. 16, 17.] <sup>15</sup> z-ka Üô-pah-lah-hen ziu næ-sing teng-dæ, teh-djôh sô ing-hyü-go.

<sup>13</sup> 神明应许亚伯拉罕时候，因为既有更加大个好指点其罚咒，就指点自罚咒，话，<sup>14</sup> 「我总会大样祝福尔，大样昌盛尔个子孙。」<sup>15</sup> 是介亚伯拉罕就耐心等待，得着所应许个。

<sup>16</sup> *Væn-pah* nying vah-tsiu, tsong z ts-tin do-jü gyi-zi go: vah-tsiu z k'ao-jih gyi *shih-wô*, 'eo-deo m-kao hao cün-pin. <sup>17</sup> Næn-kæn Jing-ming pô-feh-neng-keo keh-sing tsih-djôh Gyi ing-hyü cü-kwu hao ming-ming hyiao-teh Gyi-go ts-i z keng-kæ-feh-læ, sô-yi <sup>[1]</sup> yüong vah-tsiu shih-wô tso bing-kyü: <sup>18</sup> z-ka, yiu liang-ying keng-kæ-feh-læ-go z-ken, Jing-ming sô feh neng-keo zih-yin go; s-teh ah-lah dao-næn ky'i tsih-ziu sô ts-tin ah-lah go siang-vông cü-kwu tu hao en-en-sing-sing. <sup>19</sup> Keh-go *siang-vông* k'o-pi ling-weng-go mao, dziah-jih lao-k'ao, p'ao læ mun-tsiang lihyiang: <sup>20</sup> keh-go di-fông Yiæ-su tso sin-fong t'i ah-lah *sin* tseo-tsing-ky'i, “tsiao Mah-kyi-si-teh-go pæn-ts” üong-yün tso Tsi-s-deo.

<sup>16</sup> 凡百人罚咒，总是指点大如其自个。罚咒是靠实其说话，后头旣告好转变。<sup>17</sup> 难间神明巴弗能够箇星接着其应许主顾好明明晓得其个旨意是更改弗来，所以用罚咒说话做凭据<sup>[1]</sup>。<sup>18</sup> 是介，有两样更改弗来个事干，神明所弗能够食言个；使得阿拉逃难去接受所指点阿拉个想望主顾都好安安心心。<sup>19</sup> 箇个想望可比灵魂个锚，着实牢靠，抛来慢帐里向。<sup>20</sup> 箇个地方耶稣做先锋替阿拉先走进去，「照麦基洗德个班次」永远做祭司头。

[1] 'Ôh wô, Zi tso cong-pao vah-tsiu. 或话，自做中保罚咒。（原注）

---

## H. VII.

KEH Mah-kyi-si-teh, Sah-leng-go wông, ting kao Jing-ming-go tsi-s, zin-deo p'ong-djôh Üô-pah-lah-hen sah-ba-leh keh-sing koh-wông cün-læ, ziu coh-foh gyi; <sup>2</sup> Üô-pah-lah-hen pô ih-ts'ih-go tong-si jih-kwu-teh-ih feng peh gyi; *Mah-kyi-si-teh-go ming-z*, di-ih, z 'kong-yi wông' ka ka-shih, wa-yiu *kyiao-leh* Sah-leng wông,

ziu-z, 'bing-en-go wông';<sup>3</sup> gyi m̃-teh ah-tia, m̃-teh ah-nyiang, m̃-teh kô-pu, yia m̃-teh sang-nyih, yia m̃-teh si-gyi, z ziang Jing-ming Ng-ts ka;—— keh-go nying dziang-t'ong tso tsi-s.

箇麦基洗德，撒冷个王，顶高神明个祭司，前头碰着亚伯拉罕杀败了箇星国王转来，就祝福其；<sup>2</sup> 亚伯拉罕把一切个东西十股得一分拨其。麦基洗德个名字，第一，是「公义王」介解说，还有叫勒撒冷王，就是，「平安个王」；<sup>3</sup> 其旣得阿爹，旣得阿娘，旣得家谱，也旣得生日，也旣得死期，是像神明儿子介；——箇个人长通做祭司。

<sup>4</sup> Ng-lah ts'eng-ts'eng-k'en, tsu-tsong-deo Üô-pah-lah-hen we pô lo-liah-læ-go tong-si jih-kwu-teh-ih peh gyi, keh-go nying z dza-nyiang tseng-kwe. <sup>5</sup> Næn-kæn Li-vi ts-seng tsih-ziu tsi-s tsih-veng go cü-kwu, keh-sing pah-sing se-tsih z gyi hyüong-di, c'ih-ü Üô-pah-lah-hen-go kweh-joh, jün-r gyi vong-ts tsiao lih-fah hao do pah-sing-go tong-si jih-kwu-teh-ih: <sup>6</sup> dæn-z Mah-kyi-si-teh, z teng gyi-lah kôh [1]ts-p'a go, gyi we do Üô-pah-lah-hen-go tong-si jih-kwu-teh-ih, yi coh-foh keh yiu ing-hyü go cü-kwu. <sup>7</sup> Keh 'ô-pe teh-djôh zông-pe-go coh-foh, z m-pæn-poh-go dao-li. <sup>8</sup> Wa-yiu, dziu dông-pin k'en-læ, iao si go nying z do-kyü jih-kwu-teh-ih go; dziu keh-pin k'en-læ, keh do-kyü-go cü-kwu yiu te-tsing gyi z weh-go. <sup>9</sup> Ping-ts'ia Li-vi, se-tsih z do-kyü jih-kwu-teh-ih go cü-kwu, yia hao wô gyi dzong Üô-pah-lah-hen-go siu-li yi-kying yiu jih-kwu-teh-ih do-c'ih-de: <sup>10</sup> ing-we Mah-kyi-si-teh nying-tsih Üô-pah-lah-hen z-'eo, Li-vi wa læ gyi tsu-tsong-go sing-zông.

<sup>4</sup> 尔拉忖忖看，祖宗头亚伯拉罕会把掳掠来个东西十股得一拨其，箇个人是咋样尊贵。<sup>5</sup> 难间利未子孙接受祭司职份个主顾，箇星百姓虽即是其兄弟，出于亚伯拉罕个骨肉，然而其奉旨照律法好驮百姓个东西十股得一。<sup>6</sup> 但是麦基洗德，是等其拉各支派<sup>[1]</sup>个，其会驮亚伯拉罕个东西十股得一，又祝福箇有应许个主顾。<sup>7</sup> 箇下辈得着上辈个祝福，是旣扳驳个道理。<sup>8</sup> 还有，就荡边看来，要死个人是驮归十股得一个；就箇边看来，箇驮归个主顾有对证其是活个。<sup>9</sup> 并且利未，虽即是驮归十股得一个主顾，也好话其从亚伯拉罕个手里已经有十股得一驮出了。<sup>10</sup> 因为麦基洗德迎接亚伯拉罕时候，利未还来其祖宗个身上。

[1] 'Ôh wô, kô-pu. 或话，家谱。（原注）

<sup>11</sup> Li-vi tsi-s-go tsih-veng ziah neng-keo s-teh nying djün-be, (pah-sing z yi-kying læ gyi joh-'ô teh-djôh lih-fah,) ka-ni 'o-yüong bih-go tsi-s "tsiao Mah-kyi-si-teh-go pæn-ts'" ka c'ih-læ, feh eo gyi tsiao. Üô-leng-go pæn-ts' ni? <sup>12</sup> Tsi-s-go tsih-veng kyi-jün keng-kæ, lih-fah z-jün yia iao keng-kæ. <sup>13</sup> Keh-go shih-wô sô ts-tin-go

z joh-ü bih-go ts-p'a, bing m-yiu nying z-dzih tsi-dæn ko: <sup>14</sup> ah-lah-go Cü z ming-ming c'ih-ü Yiu-da; keh-go ts-p'a Mo-si bing m-yiu kông-djôh tsi-s tsih-veng ko.

<sup>11</sup> 利未祭司个职份若能够使得人全备，（百姓是已经来其属下得着律法，）介呢何用别个祭司「照麦基洗德个班次」介出来，弗讴其照亚伦个班次呢？<sup>12</sup> 祭司个职份既然更改，律法自然也要更改。<sup>13</sup> 箇个说话所指点个是属于别个支派，并冇有人侍值祭坛过。<sup>14</sup> 阿拉个主是明明出于犹太；箇个支派摩西并冇冇讲着祭司职份过。

<sup>15</sup> Keh-go z-ken z keng-kô hyin-jün; ing-we yiu bih-go Tsi-s ziang Mah-kyi-si-teh ka iao c'ih-læ, <sup>16</sup> Gyi feh-z tsiao nyüoh-sing 'ao-ling-go lih-fah, z tsiao m-gyüong-dzing weh-ming-go neng-ken sô shih-lih-go: <sup>17</sup> ing-we *Jing-ming* te-tsing Gyi, wô, “Ng üong-yün tso Tsi-s tsiao Mah-kyi-si-teh-go pæn-ts'.” [S. 110. 4.] <sup>18</sup> Keh zin-deo-go 'ao-ling, we-leh gyi no-ziah vu-yüong, z fi-diao-de; <sup>19</sup> (lih-fah ih-ngæn feh neng-keo s-teh nying djün-be;) <sup>[1]</sup> næn-kæn tsæ shih-c'ih keng-kô hao-go siang-vông, s-teh ah-lah k'o-yi ts'ing-gying *Jing-ming*.

<sup>15</sup> 箇个事干是更加显然；因为有别个祭司像麦基洗德介要出来，<sup>16</sup> 其弗是照肉身号令个律法，是照麦基洗德介要出来，<sup>17</sup> 因为神明对证其，话，「尔永远做祭司照麦基洗德个班次。」<sup>18</sup> 箇前头个号令，为了其懦弱无用，是废掉了。<sup>19</sup> （律法一眼弗能够使得人全备；）难间再说出更加好个想望，使得阿拉可以亲近神明<sup>[1]</sup>。

[1] 'Ôh wô, *lih-fah* peh-ko s-teh keh keng-kô hao-go siang-vông læ; k'en Ky. 3. 24: 'ôh wô, tsih-yiu sô shih-lih keh keng-kô hao-go siang-vông we s-teh nying djün-be. 或话，律法不过使得箇更加好个想望来；看 Ky. 3. 24。或话，只有所设立箇更加好个想望会使得人全备。（原注）

<sup>20</sup> Tsæ-wô, *shih-lih Yiæ-su* feh-z m̃-teh vah-tsiu;——<sup>21</sup> shih-lih gyi-lah tso tsi-s z m̃-teh vah-tsiu; tsih-yiu *Jing-ming shih-lih Yiæ-su*, vah-tsiu teng Gyi wô, “CÜ yi-kying vah-tsiu, tsæ-ve fæn-hwe; Ng üong-yün tso Tsi-s tsiao Mah-kyi-si-teh-go pæn-ts'.”——<sup>22</sup> z-ka Yiæ-su yia z keng hao iah-go Pao-nying.

<sup>20</sup> 再话，设立耶稣弗是晓得罚咒；——<sup>21</sup> 设立其拉做祭司是晓得罚咒；只有神明设立耶稣，罚咒等其话，「主已经罚咒，再膾反悔；尔永远做祭司照麦基洗德个班次。」——<sup>22</sup> 是介耶稣也是更好约个保人。

<sup>23</sup> Wa-yiu gyi-lah, we-leh iao si, feh neng-keo dziang læ-tong; sô-yi yiu hyü-to tsi-s: <sup>24</sup> tsih-yiu Yiæ-su, we-leh Gyi üong-yün læ-tong, z yiu <sup>[1]</sup> djün-ziu-feh-læ-go tsi-s tsih-veng. <sup>25</sup> Sô-yi cong-ü neng-keo kyiuh keh-sing k'ao-djôh Gyi tseo-long *Jing-ming* u-sen læ-go cü-kwu; ing-we Gyi z-djông weh-tong, hao t'i gyi-lah dæ-gyiu.

<sup>23</sup> 还有其拉，为了要死，弗能够长来东；所以有许多祭司。<sup>24</sup> 只有耶稣，为了其永远来东，是有传授弗来个<sup>[1]</sup>祭司职份。<sup>25</sup> 所以终于能够救箇星靠着其走拢神明乌碎来个主顾；因为其时常活东，好替其拉代求。

[1] 'Ôh wô, feh we ko-ky'i go. 或话，弗会过去个。（原注）

<sup>26</sup> Keh-cong-ka Tsi-s-deo k'eo-k'eo teng ah-lah siang-nyi-go; Gyi z sing-jün, lao-jih, m-yüô-tin, li-yün ze-nying, yi-kying kao-jü keh-sing t'in go; <sup>27</sup> Gyi feh ziang bih-go tsi-s-deo, sin we-leh zi-go ze, 'eo we-leh pah-sing-go ze, pih iao me-nyih hyin tsi-veh: Gyi z hyin-zông Zi-go kyi-sing tso joh-ze-go tsi-veh, tsih-siao ih-tsao ziu keo-de. <sup>28</sup> Keh lih-fah z shih-lih no-ziah-go nying tso tsi-s-deo: tsih-yiu lih-fah ts-'eo sô vah-tsiu shih-wô z shih-lih keh-go Ng-ts; Gyi yi-kying üong-yün <sup>[1]</sup>djün-be-de.

<sup>26</sup> 箇种介祭司头扣扣等阿拉相宜个；其是圣善，老实，无缺点，离远罪人，已经高如箇星天个。<sup>27</sup> 其弗像别个祭司头，先为了自个罪，后为了百姓个罪，必要每日献祭物。其是献上自个肌身做赎罪个祭物，只消一遭就够了。<sup>28</sup> 箇律法是设立懦弱个人做祭司头。只有律法之后所罚咒说话是设立箇个儿子；其已经永远全备了<sup>[1]</sup>。

[1] Yiu-teh fæn, tseng-ky'i-liao. 有得翻，尊起了。（原注）

---

## H. VIII.

NÆN-KÆN sô kông-go do-kwe-mo z ah-lah yiu ka-go Tsi-s-deo, yi-kying zo læ t'in-zông, ǃe-nyin Cü-go zo-we jing-siu-pin; <sup>2</sup> tso keh sing-jün <sup>[1]</sup>di-fông teng tsing tsiang-bong li-hyang go Bæn-z-nying: keh-go tsiang-bong z Cü sô tah, feh-z nying tah-go.

难间所讲个大规模是阿拉有介个祭司头，已经坐来天上，威严主个座位顺手边；<sup>2</sup> 做箇圣善地方<sup>[1]</sup>等真帐篷里向个办事人。箇个帐篷是主所搭，弗是人搭个。

[1] Di-fông; yiu-teh wô, tong-si. 地方；有得话，东西。（原注）

<sup>3</sup> Væn-pah tsi-s-deo z we-leh hyin li-veh teng tsi-z ka shih-lih; keh-lah keh-we Tsi-s-deo yia pih yiu soh-go tsi-veh hao hyin. <sup>4</sup> Gyi ziah læ di-'ô læ-tong, m-neh hao sön tsi-s, ing-we keh-sing tsiao lih-fah hyin li-veh go tsi-s læ-tong: <sup>5</sup> gyi-lah z læ keh t'in-zông tong-si-go siang-mao teng ing-tsong li-hyang vong-z Jing-ming; ziang

Mo-si tang-tsiang zao tsiang-bong z-'eo teh-djôh meh-z, wô, “Ng yüong siao-sing, væn-pah tong-si tu iao tsiao sæn-zông sô ts-tin ng go yang-shih ka tso.” [C. 25. 40.] <sup>6</sup> Næn-kæn *Yiæ-su* yi-kying teh-djôh keng kwe-djong-go tsih-veng, ing-we Gyi tso keng hao iah-go Cong-pao, z k'ao-djôh keng hao ing-hyü sô shih-lih-go.

<sup>3</sup> 凡百祭司头是为了献礼物等祭祀介设立；箇拉箇位祭司头也必有啥个祭物好献。<sup>4</sup> 其若来地下东，旣得好算祭司，因为箇星照律法献礼物个祭司来东。<sup>5</sup> 其拉是来箇天上东西个相貌等影踪里向奉侍神明；像摩西打账造帐篷时候得着默示，话，「尔用小心，凡百东西都要照山上所指点尔个样式介做。」 [C. 25. 40.] <sup>6</sup> 难间耶稣已经得着更贵重个职份，因为其做更好约个中保，是靠着更好应许所设立个。

<sup>7</sup> Keh zin-deo-go iah ziah-z m-kao hao p'i-bing, hao-vong tsæ tang-sön 'eo-deo-go iah. <sup>8</sup> Næn-kæn Jing-ming p'i-bing gyi-lah, wô, “CÜ z-ka wô, ‘Nyh-ts læ-gyi, Ngô teng Yi-seh-lih keh-kô lin Yiu-da keh-kô iao shih-lih ih-go sing iah; <sup>9</sup> keh feh ziang Ngô teng gyi-lah tsu-tsong sô lih-go iah, ziu-z te gyi siu iao ling gyi c'ih Yiæ-gyih z-'eo sô shih-lih-go; ing-we gyi-lah feh siu-djü Ngô-go iah, Ngô yia feh ky'i ts'æ gyi:’ keh z CÜ sô kông-go. <sup>10</sup> CÜ yi wô, ‘Ko-leh keh-sing nyih-ts Ngô teng Yi-seh-lih keh-kô iao lih go iah, ziu-z, pô Ngô-go lih-fah <sup>[1]</sup>fông læ gyi hyüong-cong, sia læ gyi sing-li: Ngô we tso gyi-go Jing-ming, gyi we tso Ngô-go pah-sing: <sup>11</sup> hao-vong ling-kyü kao gyi ling-kyü, hyüong-di kao gyi hyüong-di, wô, Ng yüong sih-teh CÜ; ing-we væn-pah; feh-leng tseng-kwe pe-zin, tu pih-ding nying-djôh Ngô: <sup>12</sup> ing-we Ngô we kw'un-shü gyi-go fi-li, feh tsæ kyi-nyæn gyi-go ze-ôh teng gyi-go ko-væn.” [Yl. 31. 31–34.]

<sup>7</sup> 箇前头个约若是旣告好批评，好留再打算后头个约。<sup>8</sup> 难间神明批评其拉，话，「主是介话，『日子来其，我等以色列箇家连犹太箇家要设立一个新约。<sup>9</sup> 箇弗像我等其拉祖宗所立个约，就是对其手要领其出埃及时候所设立个；因为其拉弗守住我个约，我也弗去睬其。』箇是主所讲个。<sup>10</sup> 主又话，『过了箇星日子我等以色列箇家要立个约，就是，把我个律法放来其胸中<sup>[1]</sup>，写来其心里。我会做其个神明，其会做我个百姓。<sup>11</sup> 好留邻居教其邻居，兄弟教其兄弟，话，尔用识得主；因为凡百，弗论尊贵卑贱，都必定认着我。<sup>12</sup> 因为我会宽恕其个非礼，弗再记念其个罪恶等其个过犯。』」 [Yl. 31. 31–34.]

[1] *Peng-veng*, s-peh gyi. 本文，赐拨其。（原注）

<sup>13</sup> Gyi kyijün wô z “sing iah,” ziu s-teh keh zin-deo-go iah we gyiu-go: væn-pah gyiu-go sæ-lôh-ky'i ziu gying-wu fi-diao-de.

<sup>12</sup> 其既然话是「新约」，就使得箇前头个约为旧个。凡百旧个衰落去就近乎废掉了。

## H. IX.

Keh zin-deo-go *iah* yia yiu voh-z *Jing-ming* go <sup>[1]</sup>li-tsih, teng joh-ü shü-kæn-zông sing-jün-go *di-fông*. <sup>2</sup> Yiu zin-pun-gyüih tsiang-bong be-hao-kæn; li-hyang yiu teng-dæ, en-coh, teng pa-kæn-go ping: keh ts'ing we "sing-jün *di-fông*." <sup>3</sup> Wa-yiu di-nyi-dao mun-tsiang 'eo-go tsiang-bong, ts'ing we "ting sing-jün *di-fông*." <sup>4</sup> yiu tin-hyang-go kying-lu, teng dön-ky'ün t'iah-kying-go *iah-siang*; *iah-siang* li-hyang yiu tsi mô-nô go kying-bing, Üô-leng ts'iu-ngô-go bông, teng *lih-iah*-go pe-ba; <sup>5</sup> zông-deo yiu yüong-wô-go Kyi-lu-ping tæ-djü eng-zo: *ngô* yin-dzæ ts'ia vong dziang-si kông gyi.

箇前头个约也有服侍神明个礼节<sup>[1]</sup>，等属于世间上圣善个地方。<sup>2</sup> 有前半橛帐篷备好间；里向有灯台，案桌，等摆间个饼。箇称为「圣善地方」。<sup>3</sup> 还有第二道幔帐后个帐篷，称为「顶圣善地方」。<sup>4</sup> 有点香个经炉，等团圈贴金个约箱；约箱里向有龇吗喙个金瓶，亚伦抽芽个棒，等立约个碑牌。<sup>5</sup> 上头有荣华个基路冰戴住恩座。我现在且留详细讲其。

[1] 'Ôh wô, kwe-kyü. 或话，规矩。（原注）

<sup>6</sup> Keh-sing tong-si kyi-jün z-ka zi-be, cong tsi-s dziang-t'ong tseo-tsing zin-pun-gyüih tsiang-bong ky'i voh-z *Jing-ming*: <sup>7</sup> 'eo-pun-gyüih tsih-yiu tsi-s-deo ih-nyin ih-tsao hao tseo-tsing; yia pih iao *do-leh* hyüih, we-leh gyi-zi teng pah-sing sô feh hyiao-teh ka væn-ko-go ze-ky'in hyin-zông-ky'i. <sup>8</sup> Sing-Ling z-ka ming-ming ts-tin *ah-lah*, zin-deo-go tsiang-bong wa lih-tong, keh sing-jün *di-fông*-go lu z feh-zing k'æ-t'ong ming-bah. <sup>9</sup> Keh-go *tsiang-bong* tông-z tso pi-fông; keh z-'eo læ-tih hyin li-veh teng tsi-z, kông-tao liang-sing-zông feh neng-keo s-teh voh-z-go cü-kwu djün-be; <sup>10</sup> peh-ko z ky'üoh-ky'üoh," hah-hah, teng kôh-yiang gyiang-nyüoh-go kwe-kyü, keh-sing nyüoh-sing-go <sup>[1]</sup>li-tsih; z *tæn-tsih* shih-lih tao ky'i-gyiu-wun-sing-go nyih-ts.

<sup>6</sup> 箇星东西既然是介齐备，众祭司长通走进前半橛帐篷去服侍神明。<sup>7</sup> 后半橛只有祭司头一年一遭好走进；也必要驮勒血，为了其自等百姓所弗晓得介犯过个罪愆献上去。<sup>8</sup> 圣灵是介明明指点阿拉，前头个帐篷还立东，箇圣善地方个路是弗曾开通明白。<sup>9</sup> 箇个帐篷当是做比方。箇时候来的献礼物等祭祀，讲到良



心上弗能够使得服侍个主顾全备。<sup>10</sup> 不过是吃吃，喝喝，等各样澆肉个规矩，箇星肉身个礼节<sup>[1]</sup>；是单只设立到弃旧换新个日子。

[1] 'Ôh wô, kwe-kyü. 或话，规矩。（原注）

<sup>11</sup> Næn-kæn Kyi-toh læ, tso tsiang-læ hao-c'ü-go Tsi-s-deo, z kying-ko keng do keng djün-be-go tsiang-bong, feh-z *nying* siu sô zao, Ziu-z wô, feh joh-ü shü-kæn-zông; <sup>12</sup> yia feh k'ao-djôh yüong-sæn-ying teng siao-ngeo-go hyüih, z k'ao-djôh Zi-go hyüih tsih-siao ih-tsao tseo-tsing keh sing-jün *di-fông*, tso-dzing üong-yün c'ü-joh-go tsi-veh. <sup>13</sup> Ziah-z keh-sing yüong-ngeo yüong-sæn-ying-go hyüih, teng ts'-ngeo-go hwe tsah læ u-ŵe cü-kwu-go sing-zông, wa neng-keo tseng-ky'i gyi, s-teh nyüoh-sing we kyih-zing; <sup>14</sup> 'o-hwông Kyi-toh, k'ao-djôh üong-yün-go *Sing-Ling* hyin-zông Zi <sup>[1]</sup>m-yüô-tin-go *kyi-sing* peh Jing-ming, Gyi-go hyüih pih *neng-keo* kyih-zing ng-lah liang-sing ky'i-diao keh-sing si-go 'ang-we, hao ky'i voh-z weh-go Jing-ming!

<sup>11</sup> 难间基督来，做将来好处个祭司头，是经过更大更全备个帐篷，弗是人手所造，就是话，弗属于世间上；<sup>12</sup> 也弗靠着雄山羊等小牛个血，是靠着自个血只消一遭走进箇圣善地方，做成永远取赎个祭物。<sup>13</sup> 若是箇星雄牛雄山羊个血，等雌牛个灰扎来污秽主顾个身上，还能够尊起其，使得肉身会洁淨；<sup>14</sup> 何况基督，靠着永远个圣灵献上自旤瑕点个<sup>[1]</sup>肌身拔神明，其个血必能够洁淨尔拉良心弃掉箇星死个行为，好去服侍活个神明！

[1] 'Ôh wô, m-p'i-bing-go. 或话，旤批评个。（原注）

<sup>15</sup> Gyi we-leh ka z tso sing iah-go Cong-pao, iao si-ts c'ü-joh væn zin iah go ze, s-teh keh-sing be dziao-læ cü-kwu hao teh-djôh sô ing-hyü üong-yün-go ts'æn-nyih. <sup>16</sup> (Væn-pah *yi-coh-go* iah pih iao <sup>[1]</sup>teng-dæ coh-t'ôh-go cü-kwu si: <sup>17</sup> ing-we *yi-coh-go* iah z læ si-'eo yiu gyng-dao; ziah-z coh-t'ôh-go cü-kwu wa weh-tong, z m-lih-go.) <sup>13</sup> Keh-lah zin-deo-go *iah*, yia pih iao yüong-djôh hyüih <sup>[2]</sup>shih-lih gyi. <sup>19</sup> Mo-si kyi-jün tsiao lih-fah kông ih-ts'ih-go feng-fu peh cong pah-sing t'ing, *ziu* tsiang siao-ngeo teng yüong-sæn-ying-go hyüih, yi pô shü teng <sup>[3]</sup>do-'ong-go yiang-mao teng ngeo-sih-ts'ao, tsah-tsah keh-peng *iah-shü* lin cong pah-sing, wô, <sup>20</sup> “Keh z Jing-ming sô feng-fu ng-lah iah go hyüih.” [C. 24. 8.] <sup>21</sup> Yi yüong hyüih yia tsah-tsah tsiang-bong teng ih-ts'ih kong-vong *Jing-ming* go ky'i-ming. <sup>22</sup> Ping-ts'ia ts'ô-feh-to long-tsong tong-si tsiao lih-fah iao yüong hyüih kyih-zing gyi: ziah feh-z liu-c'ih hyüih, m-kao hao sô-min.

<sup>15</sup> 其为了介是做新约个中保，要死仔取赎犯前约个罪，使得箇星被召来主顾好得着所应许永远个产业。<sup>16</sup> （凡百遗嘱个约必要等待<sup>[1]</sup>嘱托个主顾死。<sup>17</sup>

因为遗嘱个约是来死后有劲道；若是嘱托个主顾还活东，是𠵼力个。）<sup>18</sup> 箇拉前头个约，也必要用着血设立其<sup>[2]</sup>。<sup>19</sup> 摩西既然照律法讲一切个吩咐拨众百姓听，就将小牛等雄山羊个血，又把水等大红个<sup>[3]</sup>羊毛等牛膝草，扎扎箇本约书连众百姓，话，<sup>20</sup> 「箇是神明所吩咐尔拉约个血。」 [C. 24. 8.] <sup>21</sup> 又用血也扎扎帐篷等一切供奉神明个器皿。<sup>22</sup> 并且差弗多拢总东西照律法要用血洁淨其。若弗是流出血，𠵼告好赦免。

[1] 'Ôh wô, k'ao-jih. 或话，靠实。（原注）

[2] 'Ôh wô, sing lih gyi. 或话，新立其。（原注）

[3] 'Ôh wô, ts-'ong-go. 或话，紫红个。（原注）

<sup>23</sup> Ka-ni keh-sing tsia-ing t'in-zông go tong-si, pih iao z-ka s-teh gyi kyih-zing; ziah tsing-tsing z t'in-zông-go tong-si, *pih iao* yüong keng hao-go tsi-veh *kyih-zing* gyi. <sup>24</sup> Ing-we Kyi-toh feh-z tseo-tsing *nying* siu-li sô zao-go sing-jün *di-fông*, *peh-ko* z keh tsing *sing-jün di-fông-go* te-tsiao; *Gyi* z nying-tsing *tseo-tsing* t'in-li, yin-dzæ iao læ Jing-ming-go min-zin dæ-teng ah-lah yin-c'ih-læ. <sup>25</sup> Yia bing feh-z iao le-ts' hyin-zông Zi, ziang tsi-s-deo ta-leh feh-z zi-go hyüih me-nyin tseo-tsing keh sing-jün *di-fông* ka; <sup>26</sup> (jü-ko z-ka, dzong k'æ-bih yi-læ pih kyiao-leh le-ts' ziu næn: ) dæn-z yin-dzæ meh-dæ z-shü *Gyi* tsih-siao ih-tsao hyin-c'ih-læ, hyin-zông Zi tso tsi-veh, hao djü-diao ze. <sup>27</sup> Wa-yiu kyijün ding-kwe *cong-nying* yiu ih-tsao si, si-'eo yiu sing-p'un; <sup>28</sup> z-ka Kyi-toh *yia* ih-tsao be hyin-zông hao tæntông hyü-to nying-go ze; *Gyi* pih-ding di-nyi-tsao, ih-ngæn m-kao ze, we hyin-c'ih-læ *peh* keh-sing teng-dæ *Gyi* go cü-kwu k'en, hao *peh* gyi-lah teh-kyiu.

<sup>23</sup> 介呢箇星借印天上个东西，必要是介使得其洁淨；若真正是天上个东西，必要用更好个祭物洁淨其。<sup>24</sup> 因为基督弗是走进人手里所造个圣善地方，不过是箇真圣善地方个对照；其是迎进走进天里，现在要来神明个面前代等阿拉现出来。<sup>25</sup> 也并弗是要屡次献上自，像祭司头带勒弗是自个血每年走进箇圣善地方介；<sup>26</sup> （如果是介，从开辟以来必叫勒屡次受难。）但是现在末代时世其只消一遭显出来，献上自做祭物，好除掉罪。<sup>27</sup> 还有既然定规众人有一遭死，死后有审判；<sup>28</sup> 是介基督也一遭被献上好担当许多人个罪；其必定第二遭，一眼𠵼告罪，会显出来拨箇星等待其个主顾看，好拨其拉得救。

Lih-fah *peh-ko* yiu tsiang-læ hao-c'ü-go ing-tsong, m̃-teh keh-sing tong-si-go jih-we ying-ziang, sô-yi ih-ngæn feh neng-keo we-leh me-nyin dziang-t'ong sô hyin-zông-go tso-ziang tsi-veh s-teh keh-sing tseo-long-go cü-kwu djün-be.”<sup>2</sup> Ziah *neng-keo* z-ka, keh-sing voh-z-go cü-kwu ih-tsao long kyih-zing, gyi-go liang-sing yi-'eo ih-ngæn feh we kôh-djôh ze, keh hyin-tsi-go z-ken<sup>[1]</sup>ky'i feh hao hyih-tsôh?<sup>3</sup> Jün-r keh-sing tsi-veh z *deh-we* nyin-nyin læ-tih di-sing gyi-go ze.<sup>4</sup> Keh-sing yüong-ngeo yüong-sæn-ziang-go hyüih tön feh neng-keo djü-diao ze.

律法不过有将来好处个影踪，旡得箇星东西个实惠形象，所以一眼弗能够为了每年长通所献上个做样祭物使得箇星走拢个主顾全备。<sup>2</sup> 若能够是介，箇星服侍个主顾一遭拢洁淨，其个良心以后一眼弗会觉着罪，箇献祭个事干岂弗好歇作<sup>[1]</sup>？<sup>3</sup> 然而箇星祭物是特为年年来的提醒其个罪。<sup>4</sup> 箇星雄牛雄山羊个血断弗能够除掉罪。

[1] 'Ôh wô, pih-ding we hyih-tsôh. 或话，必定会歇作。（原注）

<sup>5</sup> Keh-lah *Kyi-toh* tseo-tsing shü-kæn-zông læ z-'eo yiu ka wô, “Tsi-z teng foh-li Ng feh iao-go; z be-hao ih-go kyi-sing *peh Ngô*:<sup>6</sup> siao-hwô-go tsi-veh teng joh-ze-go *tsi-veh* Ng feh hwun-hyi.”<sup>7</sup> Ngô ziu wô, “Ts'ia-k'en, Ngô læ-tong; iao tso-dzing Ng Jing-ming go ts-i: *ziang* kying-kyün-li sô sia-tih ts-tin Ngô go.” [S. 4. 68.]<sup>8</sup> Zông-veng wô, “Tsi-z, foh-li, siao-hwô-go tsi-veh, teng joh-ze-go *tsi-veh*,” (ziu-z tsiao lih-fah sô hyin-zông-go,) “Ng tu feh iao, feh hwun-hyi.”<sup>9</sup> 'eo-deo wô, “Ts'ia-k'en, Ngô læ-tong; iao tso-dzing Ng Jing-ming go ts-i.” *Keh* z djü-diao gyi zin-deo, iao shih-lih gyi 'eo-deo go.<sup>10</sup> We-leh keh-go ts-i, k'ao-djôh Yiæ-su *Kyi-toh*-go kyi-sing tsih-siao ih-tsao hyin-zông, ah-lah z tseng-ky'i-liao-go.

<sup>5</sup> 箇拉基督走进世间上来时候有介话，「祭祀等福礼尔弗要个；是备好一个肌身拨我。<sup>6</sup> 烧化个祭物等赎罪个祭物尔弗欢喜。<sup>7</sup> 我就话，『且看，我来东；要做成尔神明个旨意。』像经卷里所写的指点我个。」[S. 4. 68.]<sup>8</sup> 上文话，「祭祀，福礼，烧化个祭物，等赎罪个祭物，」（就是照律法所献上个，）「尔都弗要，弗欢喜。」<sup>9</sup> 后头话，「且看，我来东；要做成尔神明个旨意。」箇是除掉其前头，要设立其后头个。<sup>10</sup> 为了箇个旨意，靠着耶稣基督个肌身只消一遭献上，阿拉是尊起了个。

<sup>11</sup> Væn-pah tsi-s me-nyih lih-ts kong-vong *Jing-ming*, le-ts' hyin-zông tso-ziang tsi-veh, z ih-ngæn feh neng-keo t'eh-diao ze:<sup>12</sup> tsih-yiu keh-we *Kyi-toh* hyin-zông ih-go joh-ze tsi-veh, dziang-t'ong zo læ Jing-ming-go jing-siu-pin;<sup>13</sup> yi-'eo tæen-teng Gyi dziu-dih tso Gyi-go dah-kyiah-teng.<sup>14</sup> Gyi hyin-zông ih-go *tsi-veh*, we s-teh keh-sing be tseng-ky'i-go cü-kwu üong-yün djün-be.

<sup>11</sup> 凡百祭司每日立仔供奉神明，屡次献上做样祭物，是一眼弗能够脱掉罪。<sup>12</sup> 只有箇位基督献上一个赎罪祭物，长通坐来神明个顺手边；<sup>13</sup> 以后单等其仇敌做其个踏脚凳。<sup>14</sup> 其献上一个祭物，会使得箇星被尊起个主顾永远全备。

<sup>15</sup> Keh-we Sing-Ling yia teng ah-lah tso te-tsing: Gyi yü-sin sô kông, <sup>16</sup> “CÜ z-ka wô, Ko-leh keh-sing nyih-ts Ngô teng gyi-lah iao lih-go iah, ziu-z, pô Ngô-go lih-fah fông læ gyi sing-li, sia læ gyi hyüong-cong ; <sup>17</sup> ping-ts'ia wô, “Ngô feh tsæ kyi-nyiaen gyi-go ze-ôh teng gyi-go ko-væn.” [Yl. 31. 33, 34.] <sup>18</sup> Ze-ôh teng ko-væn yi-kying sô-diao, hao-vong tsæ hyin joh-ze-go tsi-veh.

<sup>15</sup> 箇位圣灵也等阿拉做对证。其预先所讲，<sup>16</sup> 「主是介话，『过了箇星日子我等其拉要立个约，就是，把我个律法放来其心里，写来其胸中；』」<sup>17</sup> 并且话，「『我弗再记念其个罪恶等其个过犯。』」 [Yl. 31. 33, 34.] <sup>18</sup> 罪恶等过犯已经赦掉，好留再献赎罪个祭物。

<sup>19</sup> KA-NI, hyüong-di, ah-lah k'ao-djôh Yia-su-go hyüih k'o-yi fông-tæn tseo-tsing keh sing-jün di-fông; <sup>20</sup> (ziu-z Gyi we-leh ah-lah sô sing-k'æ keh-da ts'oh-tsæn-sing-go weh-lu, dzong keh-dao mun-tsiang, ziu-z Gyi nyüoh-sing, ka ko-læ-go: ) <sup>21</sup> ping-ts'ia **yi**u ih-go do Tsi-s djü Jing-ming-go ih-kô,— <sup>22</sup> sô-yi ah-lah, be hyüih tsah læ sing-li ky'i-diao liang-sing sô tsah-vah-go ôh, yia be ts'ing shü gyiang-ken-zing kyi-sing, kæ yüong dzing-jih-go sing-dziang toh-jih-go siang-sing ky'i tseo-long Jing-ming-go u-sen.

<sup>19</sup> 介呢，兄弟，阿拉靠着耶稣个血可以放胆走进箇圣善地方；<sup>20</sup> （就是其为了阿拉所新开箇埭簇斩新个活路，从箇道幔帐，就是其肉身，介过来个。）<sup>21</sup> 并且有一个大祭司治神明个一家，——<sup>22</sup> 所以阿拉，被血扎来心里弃掉良心所责罚个恶，也被清水浣干净肌身，该用诚实个心肠笃实个相信去走拢神明个乌碎。

<sup>23</sup> Ah-lah sô siang-vông-go foh-ky'i, kæ lih-ding cü-i ky'i tsiao-jing gyi; feh-k'o yiao-dong: ing-we ing-hyü ah-lah go Cü-kwu z sing-jih-go. <sup>24</sup> Ping-ts'ia kæ dô-kô kwu-djôh, dô-kô min-li, dzeng jing-æ ky'i 'ang-jün. <sup>25</sup> Kyiao-we-li feh-k'o feh jü-long, ziang yiu-teh-go nying ka; z iao siang-ky'ün: k'en-kyin keh-go nyih-ts gying-de, kæ yü-kô z-ka tso.

<sup>23</sup> 阿拉所想望个福气，该立定主意去招认其；弗可摇动。因为应许阿拉个主顾是信实个。<sup>24</sup> 并且该大家顾着，大家勉励，存仁爱去行善。<sup>25</sup> 教会里弗可弗聚拢，像有得个人介；是要相劝。看见箇个日子近了，该愈加是介做。

<sup>26</sup> Ah-lah sih-teh tsing dao-li ts-'eo ziah-z kwu-i ky'i væn-ze, tön feh neng-keo tsæ yiu joh-ze-go tsi-veh; <sup>27</sup> tsih-yiu gwah-gwah-teo teng-dæ sing-p'un, teng tsiang-læ iao ky'üoh-meh dziu-dih *ziang mang-ho ka ô-wông*. <sup>28</sup> Væn-pah ky'i-diao Mo-si lih-fah go cü-kwu, yiu liang-sæn-go nying tso te-tsing, *pih iao si*, feh æ-lin gyi: <sup>29</sup> 'o-hwông dzin-dah Jing-ming-go Ng-ts, sön sô tseng-ky'i gyi keh *lih-iah-go* hyüih z feh. kyih-zing, ping-ts'ia tsao-t'ah keh eng-we-go *Sing-Ling*, ng ts'eng keh-go *nying* feh kæ ziu keng-kô djong-go ying-vah ma? <sup>30</sup> Ah-lah hyiao-teh jü yiu *ka kông*, "Cü wô, 'Sing-ün dzæ Ngô, Ngô we wæn-pao:" [Sm. 32. 35.] wa-yiu, "CÜ we sing-p'un Gyi-go pah-sing." [Sm. 32. 36.] <sup>31</sup> Lôh læ weh Jing-ming-go siu-li, tsing-tsing k'o p'ô.

<sup>26</sup> 阿拉识得真道理之后若是故意去犯罪，断弗能够再有赎罪个祭物；<sup>27</sup> 只有刮刮抖等待审判，等将来要吃没仇敌像猛火介愠惶。<sup>28</sup> 凡百弃掉摩西律法个主顾，有两三个人做对证，必要死，弗哀怜其。<sup>29</sup> 何况践踏神明个儿子，算所尊起其箇立约个血是弗洁淨，并且糟蹋箇恩惠个圣灵，尔忖箇个人弗该受更加重个刑罚吗？<sup>30</sup> 阿拉晓得谁有介讲，「主话，『伸冤在我，我会还报。』」[Sm. 32. 35.] 还有，「主会审判其个百姓。」[Sm. 32. 36.] <sup>31</sup> 落来活神明个手里，真正可怕。

<sup>32</sup> Ng-lah kæ ts'eng-tao zin-deo-go nyih-ts, ng-lah teh-djôh kwông-ming ts-'eo ziu we jing-næ hyü-to næn-deo, *tsing-ziang pi-vu ka*: <sup>33</sup> fi-dæn læ cong-nying-go ngæn-zin be zôh-mô, ziu kw'eng-kw'u; ziu-z bih-nying tsao-djôh keh-cü-ka *næn-deo*, ng-lah yia we dô-kô yiu-veng. <sup>34</sup> Ing-we ng-lah z t'i-liang æ-lin ngô-go lin-diao; *nying-kô* deh ng-go kô-kyi, ng-lah we hwun-hwun-hyi-hyi; <sup>[1]</sup>ing-we hyiao-teh ng-lah zi læ t'in-zông yiu keng-kô hao, dziang læ-tong-go kô-kyi.

<sup>32</sup> 尔拉该忖到前头个日子，尔拉得着光明之后就会忍耐许多难头，正像比武介。<sup>33</sup> 非但来「众人个眼前被警骂，受困苦；就是别人遭着箇株介难头，尔拉也会大家有份。<sup>34</sup> 因为尔拉是体谅哀怜我个链条；人家夺尔个家计，尔拉会欢欢喜喜；因为晓得尔拉自<sup>[1]</sup>来天上有更加好，长来东个家计。

[1] 'Ôh wô, zi hyiao-teh. 或话，自晓得。（原注）

<sup>35</sup> Ka-ni, feh-k'o sông-diao ng-go tæen-liang; gyi tsong we teh-djôh do-do sông-s. "Ng-lah pih iao jing-næ; s-teh ng-lah, tso-dzing Jing-ming-go ts-i, hao teh-djôh keh-go ing-hyü. Tsæ z ih-zông-zông, "keh-we iao læ go Cü-kwu ziu tao, feh we tæen-kôh. <sup>38</sup> Tsing-dzih nying z dzong siang-sing hao weh: ziah-z tao-t'e-go cü-kwu, Ngô-go sing tsong feh hwun-hyi gyi." [Hp. 2. 3,4, LXX.] <sup>39</sup> Tsih-yiu ah-lah feh-z tao-t'e iao mih-vông go *nying*, z siang-sing hao kyi z weh-ling go.

<sup>35</sup> 介呢，弗可丧掉尔个胆量；其总会得着大大赏赐。<sup>36</sup> 尔拉必要忍耐；使得尔拉，做成神明个旨意，好得着箇个应许。<sup>37</sup> 再是一晌晌，箇位要来个主顾就到，弗会耽搁。<sup>38</sup> 「正直人是从相信好活；若是倒退个主顾，我个心总弗欢喜其。」 [Hp. 2. 3,4, LXX.] <sup>39</sup> 只有阿拉弗是倒退要灭亡个人，是相信好救自活灵个。

---

## H. XI.

NÆN-KÆN siang-sing, ziu-z sô siang-vông *tong-si-go* <sup>[1]</sup>dziah-lôh; sô m-neh k'en-kyin *tong-si-go* bing-kyü. <sup>2</sup> We-leh yiu siang-sing, keh-sing tsiang-lao z teh-djôh hao te-tsing.

难间相信，就是所想要东西个着落<sup>[1]</sup>，所晓得看见东西个凭据。<sup>2</sup> 为了有相信，箇星长老是得着好对证。

[1] 'Ôh wô, ky'üôh-jih. 或话，确实。（原注）

<sup>3</sup> We-leh yiu siang-sing, ah-lah hyiao-teh t'in-di z k'ao-djôh Jing-ming-go 'ao-ling sô zao-dzing; gyi k'en-leh-kyin-go *tong-si* feh-z dzong yi-kying hyin-c'ih-tong ka læ-go.

<sup>3</sup> 为了有相信，阿拉晓得天地是靠着神明个号令所造成；其看勒见个东西弗是从已经显出东介来个。

<sup>4</sup> We-leh yiu siang-sing, Üô-pah hyin tsi-veh peh Jing-ming pi Kæ-ing yü-kô hao: k'ao-djôh keh-go *siang-sing* Üô-pah yiu te-tsing gyi z tsing-dzih-go, ing-we, Jing-ming te-tsing gyi li-veh: sô-yi gyi se-tsih si, dzing-gyiu <sup>[1]</sup>læ-tih kông shih-wô.

<sup>4</sup> 为了有相信，亚伯献祭物拨神明比该隐愈加好。靠着箇个相信亚伯有对证其是正直个，因为，神明对证其礼物。所以其虽即死，仍旧来的讲说话<sup>[1]</sup>。

[1] 'Ôh wô, nying-kô kông-tao gyi-go z-ken. 或话，人家讲到其个事干。（原注）

<sup>5</sup> We-leh yiu siang-sing, Yi-nôh be siu-leh-ky'i, m-neh k'en-kyin si; "ing-we Jing-ming yi-kying siu-leh-ky'i, sô-yi *cong-ü* zing gyi feh-djôh:" [Ts. 5. 24.] feh-zing siu-ky'i ts-zin, yiu te-tsing gyi z peh Jing-ming hwun-hyi. <sup>6</sup> M̃-teh siang-sing, feh neng-keo peh Gyi hwun-hyi: ing-we tseo-long Jing-ming u-sen læ-go cü-kwu pih iao siang-sing Gyi z yiu-go, yia we sông-s keh-sing gyin-sing gyiu Gyi go nying.

<sup>5</sup> 为了有相信，以诺被收勒去，晓得看见死；「因为神明已经收勒去，所以终于寻其弗着。」[Ts. 5. 24.] 弗曾收去之前，有对证其是拨神明欢喜。<sup>6</sup> 晓得相信，弗能够拨其欢喜。因为走拢神明乌碎来个主顾必要相信其是有个，也会赏赐箇星虔心求其个人。

<sup>7</sup> We-leh yiu siang-sing, Nô-üô teh-djôh meh-z ts-tin feh-zing k'en-kyin-go z-ken, [<sup>1</sup>]sing-li p'ô-gyü, ziu be-bæn ih-tsah kyi zi 'eh-kô go fông-jün; sô-yi ding shü-kæn-zông-go ze, yi tsih-djôh keh dzong siang-sing ka læ-go kong-yi tso ts'æn-nyih.

<sup>7</sup> 为了有相信，挪亚得着默示指点弗曾看见个事干，心里怕惧<sup>[1]</sup>，就备办一只救自合家个方船。所以定世间上个罪，又接着箇从相信介来个公义做产业。

[1] 'Ôh wô, dzeng tseng-kying p'ô-gyü-go sing; 'ôh, siao-sing kwu-djôh. 或话，存尊敬怕惧个心；或，小心顾着。（原注）

<sup>8</sup> We-leh yiu siang-sing, Üô-pah-lah-hen be dziao-læ ziu vong-ts tseo-c'ih tao gyi tsiang-læ iao teh-djôh tso ts'æn-nyih go u-sen; gyi tseo-c'ih z-'eo feh hyiao-teh tao 'ah-li ky'i. <sup>9</sup> We-leh yiu siang-sing, ziu tæ-n-kôh læ sô ing-hyü-go di-fông, tsing-ziang bih-nying-go di-fông ka; teng Yi-sah Yüô-kôh tu deng læ tsiang-bong li-hyang: (ziu-z teng gyi dô-kô tsih-djôh keh ing-hyü go cü-kwu: ) <sup>10</sup> gyi z teng-dæ keh-zo yiu keng-kyi go dzing-ts, Jing-ming sô kyin-lih, sô ts'ông-zao-go.

<sup>8</sup> 为了有相信，亚伯拉罕被召来就奉旨走出到其将来要得着做产业个乌碎；其走出时候弗晓得到何里去。<sup>9</sup> 为了有相信，就耽搁来所应许个地方，正像别人个地方介；等以撒雅各都庵来帐篷里向。（就是等其大家接着箇应许个主顾。）<sup>10</sup> 其是等待箇座有根基个城子，神明所建立，所创造个。

<sup>11</sup> We-leh yiu siang-sing, Sah-lah zi, z-'eo yi-kying ko-deo, yia neng-keo dzing-yüing sang ng-ts, ing-we sön keh ing-hyü gyi Cü-kwu z sing-jih-go. <sup>12</sup> Keh-lah dzong ih-go hyüih-ky'i yi-kying kw'u-sao-go nying we sang-ts'æn ziang t'in-li-go sing-siu ka to, ziang hæ-du-go sô-nyi ka su-feh-pin.

<sup>11</sup> 为了有相信，撒拉自，时候已经过头，也能够成孕生儿子，因为算箇应许其主顾是信实个。<sup>12</sup> 箇拉从一个血气已经枯燥个人会生产像天里个星宿介多，像海涂个沙泥介数弗遍。

<sup>13</sup> Keh-sing tu [<sup>1</sup>]dzeng siang-sing-go sing, si-de; feh-zing teh-djôh keh-sing ing-hyü, tæ-n-tsih yün-yün k'en-kyin gyi, toh-jih siang-sing gyi, ih-sing ky'i-mo gyi, zi wô læ shü-kæn-zông z nga-læ-nying, z c'ih-meng-nying. <sup>14</sup> Ka kông-go cü-kwu z ming-ming wô gyi læ-tih zing peng-koh. <sup>15</sup> Ziah-z kwô-nyiaen sô tseo-c'ih-go di-

*fông*, *tsong yiu kyî-we hao kyü-ky'î*: <sup>16</sup> *næn-kæn z ky'î-mo keng hao-go koh*, *ziu-z t'in-koh*: *sô-yi Jing-ming ts'ing we gyi-lah-go Jing-ming*, *m-kao wông-k'ong*; *z yi-kying teng gyi-lah be-bæn ih-zo dzing-ts*.

<sup>13</sup> 箇星都存相信个心<sup>[1]</sup>, 死了; 弗曾得着箇星应许, 单只远远看见其, 笃实相信其, 一心企慕其, 自话来世间上是外来人, 是出门人。<sup>14</sup> 介讲个主顾是明明话其来的寻本国。<sup>15</sup> 若是挂念所走出个地方, 总有机会好归去。<sup>16</sup> 难间是企慕更好个国, 就是天国。所以神明称为其拉个神明, 旣告惶恐; 是已经等其拉备办一座城子。

[1] *Peng-veng*, *tsiao siang-sing ka*. 本文, 照相信介。(原注)

<sup>17, 18</sup> *We-leh yiu siang-sing*, *Üô-pah-lah-hen be s-lin z-'eo ziu hyin-zông Yi-sah*: *gyi z yi-kying tsih-ziu keh-sing ing-hyü*, *Jing-ming yi teng gyi wô*, “*Dzong Yi-sah ka læ-go hao sön ng-go 'eo-dæ*,” [Ts. 21. 12.] *næn-kæn wa we hyin-zông gyi doh-ying ng-ts*. <sup>19</sup> *Gyi-zi ts'eng ding-tông Jing-ming neng-keo s-teh gyi dzong si-go cong-nyiang weh-cün-læ*: *'eo-deo tso-læ tsing-ziang dzong si-go cong-nyiang yi teh-tao-siu*.

<sup>17, 18</sup> 为了有相信, 亚伯拉罕被试炼时候就献上以撒。其是已经接受箇星应许, 神明又等其话, 「从以撒介来个好算尔个后代,」 难间还会献上其独养儿子。<sup>19</sup> 其自忖停当神明能够使得其从死个中央活转来; 后头做来正像从死个中央又得到手。

<sup>20</sup> *We-leh yiu siang-sing*, *Yi-sah ts-tin tsiang-læ z-ken coh-foh Yüô-kôh teng Yi-sao*.

<sup>20</sup> 为了有相信, 以撒指点将来事干祝福雅各等以扫。

<sup>21</sup> *We-leh yiu siang-sing*, *Yüô-kôh ling-si z-'eo coh-foh Iah-seh liang-go ng-ts*; *ping-ts'ia* “*tông-leh æ-dziang pa-pa Jing-ming*.” [Ts. 47. 31, LXX.]

<sup>21</sup> 为了有相信, 雅各临死时候祝福约瑟两个儿子; 并且「挡勒哀杖拜拜神明。」 [Ts. 47. 31, LXX.]

<sup>22</sup> *We-leh yiu siang-sing*, *Iah-seh ling-cong z-'eo* <sup>[1]</sup> *kông-tao Yi-seh-lih nying c'ih Yiæ-gyih go z-ken*, *yia ts-tin zi-go s-kweh t'ôh-fu gyi*.

<sup>22</sup> 为了有相信, 约瑟临终时候讲到<sup>[1]</sup>以色列人出埃及个事干, 也指点自个尸骨托付其。

[1] *'Ôh wô*, *ts'eng-tao*; *'ôh*, *kyi-nyiaen*. 或话, 忖到; 或, 纪念。(原注)



<sup>23</sup> We-leh yiu siang-sing, Mo-si sang-c'ih z-'eo, gyi-go vu-meo k'en keh na-hwun "siang-mao fi-væn," [C. 2. 2.] k'ông-leh sæn-ko yüih; yia feh p'ô wông-fah. <sup>24</sup> We-leh yiu siang-sing, Mo-si dzing-nying-tsiang-da feh k'eng ts'ing we Fah-lao nön-go ng-ts; <sup>25</sup> neng-s teng Jing-ming-go pah-sing dong ziu kw'u-næn, feh iao dzæn-z ziu-yüong ze-ôh-go hao-c'ü. <sup>26</sup> gyi sön <sup>[1]</sup>Kyi-toh-go zôh-mô pi Yiæ-gyih ih-ts'ih-go dzæ-veh keng-kô pao-pe; ing-we nyiang-vông keh 'eo-læ-go sông. <sup>27</sup> We-leh yiu siang-sing, gyi li-k'æ Yiæ-gyih, feh p'ô wông-ti-go ô-wông: gyi dzeng dziang-yün-ts sing, tsing-ziang k'en-kyin keh-we k'en-feh-kyin-go *Jing-ming* ka. <sup>28</sup> We-leh yiu siang-sing, gyi siu yü-yüih-tsih teng tsah-hyüih-go li, vi-min ts'ao-mih keh-sing deo-ih-t'æ sang-c'ih-go cü-kwu yia iao lin-le gyi-lah.

<sup>23</sup> 为了有相信，摩西生出时候，其个父母看箇奶花「相貌非凡」[C. 2. 2.]，园勒三个月；也弗怕王法。<sup>24</sup> 为了有相信，摩西成人长大弗肯称为法老囡个儿子；<sup>25</sup> 能使等神明个百姓同受苦难，弗要暂时受用罪恶个好处。<sup>26</sup> 其算基督个髒骂<sup>[1]</sup>比埃及一切个财物更加宝贝；因为仰望箇后来个赏。<sup>27</sup> 为了有相信，其离开埃及，弗怕皇帝个慳惶。其存长远之心，正像看见箇位看弗见个神明介。<sup>28</sup> 为了有相信，其守逾越节等扎血个礼，未免抄灭箇星头一胎生出个主顾也要连累其拉。

[1] 'Ôh wô, Kyi-toh-go tao-me; 'ôh, we-leh Kyi-toh be zôh-mô. 或话，基督个倒霉；或，为了基督被髒骂。（原注）

<sup>29</sup> We-leh yiu siang-sing, Yi-seh-lih nying du-ko 'Ong-hæ ziang tseo sao-di ka: Yiæ-gyih nying yia siang ky'i tseo-ko-ky'i, tu tsing-sah-de. <sup>30</sup> We-leh yiu siang-sing, Yiæ-li-ko dzing-ts be we-cün ts'ih nyih, ziu tih-tao-de.

<sup>29</sup> 为了有相信，以色列人渡过红海像走燥地介。埃及人也想去走过去，都浸煞了。<sup>30</sup> 为了有相信，耶利哥城子被围转七日，就跌倒了。

<sup>31</sup> We-leh yiu siang-sing, gyi-nyü Lah-'eh 'o-'o-ky'i-ky'i siu-liu keh-sing t'en-ts, ziu feh teng <sup>[1]</sup>feh i-jing cü-kwu dô-kô mih-vông.

<sup>31</sup> 为了有相信，妓女喇合和和气气收留箇星探子，就弗等弗依顺主顾<sup>[1]</sup>大家灭亡。

[1] *Yiu-teh wô*, feh-siang-sing cü-kwu. 有得话，弗相信主顾。（原注）

<sup>32</sup> Keh-tsao ngô 'o-pih tsæ kông Ing-we kông-tao Gyi-din, Pô-leh, Seng-seng, Yiæ-feh-da, Da-bih, Sah-meo-r, teng cong sin-cü-nying, z-'eo yia læ-feh-gyi. <sup>33</sup> Gyi k'ao-djôh siang-sing cü-voh *dih-koh*, tso-dzing kong-yi, teh-djôh ing-hyü, gyin-djü s-ts-go k'eo, <sup>34</sup> p'oh-mih ho-go shü-dao, bi-ko tao-k'eo; no-ziah we pin kông-

gyiang; tang-tsiang we tso ing-yüong; p'o-diao nga-koh-nying-go dzing-shü; <sup>35</sup> yiu nyü-nying we teh-djôh gyi-zi-go nying si-ts tsæ weh. Yia yiu nying ziu ts'æn-k'oh-go ying-vah, feh iao min-diao; z siang teh-djôh keng hao tsæ-weh-go *foh-ky'i*; <sup>36</sup> wa yiu-teh-go be tsao-t'ah, k'ao-tang, teng lin-diao, lao-kæn sô s-lin; <sup>37</sup> be zah-deo k'ang, be ken ka, be ying-yiu, si læ tao-k'eo; c'ün wu-ying sæn-ying bi tseo-læ-tseo-ky'i, m-ky'üoh-yüong, ziu kw'eng-kw'u, be sông-æ; <sup>38</sup> læ kw'ông-iæ, sæn-ling, zah-dong, di-yüih li-hyang tong-peng-si-tseo: *jün-r* shü-kæn-zông teng keh-cü-ka nying feh siang-nyi-go.

<sup>32</sup> 箇遭我何必再讲。因为讲到其田，巴勒，参孙，耶弗大，大辟，撒母耳，等众先知人，时候也来弗及。<sup>33</sup> 其靠着相信制服敌国，做成公义，得着应许，钳住狮子个口，<sup>34</sup> 扑灭火个势道，避过刀口；懦弱会变刚强；打仗会做英雄；破掉外国人个阵势。<sup>35</sup> 有女人会得着其自个人死仔再活。也有人受惨酷个刑罚，弗要免掉；是想得着更好再活个福气。<sup>36</sup> 还有得个被糟蹋，敲打，等链条，牢监所试炼；<sup>37</sup> 被石头揩，被锯解，被引诱，死来刀口；穿湖羊山羊皮走来走去，吮吃用，受困苦，被伤害；<sup>38</sup> 来旷野，山岭，石洞，地穴里向东奔西走。然而世间上等箇株介人弗相宜个。

<sup>39</sup> Keh-sing nying se-tsih k'ao-djôh siang-sing tu yiu hao te-tsing, *tsih-z* m-neh teh-djôh keh-go ing-hyü: <sup>40</sup> ing-we Jing-ming z we-leh ah-lah yü-sin be-bæn ih-ying keng hao-go z-ken; s-teh gyi-lah, ziah-z m-teh ah-lah dong-de læ-tong, feh neng-keo djün-be.

<sup>39</sup> 箇星人虽即靠着相信都有好对证，只是旣得得着箇个应许。<sup>40</sup> 因为神明是为了阿拉预先备办一样更好个事干；使得其拉，若是旣得阿拉同队来东，弗能够全备。

## H. XII.

Sô-yi ah-lah kyi-jün yiu ka hyü-to kyin-tsing *ziang* yüing ka dön-ky'ün we-djü, ziu kæ sia-diao ih-ts'ih-go djong-tæn, teng yüong-yi dzin-ziao go ze-nyih; sô ts-ying ah-lah go lu-dzing, kæ næ-sing peng-zông-ky'i; <sup>2</sup> kæ z-djông nyiang-vông Yia-su, *ziu-z* keh-we <sup>[1]</sup>shih-lih wun-djün *ah-lah-go* siang-sing Cü-kwu: Gyi, we-leh sô ts-tin Gyi go kw'a-lôh, we jing-næ jih-z-kô-go *kw'u-deo*, feh kwu tao-me; *yin-dzæ* zo læ Jing-ming zo-we-go jing-siu-pin. <sup>3</sup> Gyi yi-kying jing-næ ze-nying

keh-cü-ka wǎng-dzin, ng yüong s-ts'eng Gyi; sæn-leh ng-lah bi-gyün, sing-li t'eh-lih.

所以阿拉既然有介许多见证像云介团圈围住，就该卸掉一切个重担，等容易缠扰个罪孽；所指引阿拉个路程，该耐心奔上去；<sup>2</sup> 该时常仰望耶稣，就是箇位设立<sup>[1]</sup>完全阿拉个相信主顾。其，为了所指点其个快乐，会忍耐十字架个苦头，弗顾倒霉；现在坐来神明座位个顺手边。<sup>3</sup> 其已经忍耐罪人箇株介横缠，尔用思忖其；省勒尔拉疲倦，心里脱力。

[1] Shih-lih: 'ôh wô, ling-deo; 'ôh, tso Keng-nyün, Sd. 3. 15; 'ôh, tso Kyüing-wông, Sd. 5. 31. H. 2. 10. 设立：或话，零头；或，做根源，Sd. 3. 15；或，做君王，Sd. 5. 31. H. 2. 10。（原注）

<sup>4</sup> Ng-lah ti-tông ze-ôh, wa m̃-teh tsang tao hyüih-c'ih: <sup>5</sup> ping-ts'ia z yi-kying mông-kyi sô ky'ün ng-lah, ziang ky'ün ng-ts ka, ziu-z wô, “Ngô-go ng-ts, Cü tsah-be ng, feh-k'o ky'ing-yi hweh-liah; Cü p'i-bing ng, feh-k'o t'eh-lih: <sup>6</sup> ing-we Cü sô æ-sih-go, tsong tsah-be gyi; væn-pah sô siu-liu-go ng-ts, tsong we tang gyi.” [Ty. 3. 11, 12, LXX.] <sup>7</sup> Ng-lah ziah næ-sing ziu tsah-be, z Jing-ming dæ ng ziang ng-ts ka: 'ah-li ih-go ng-ts, ah-tia feh tsah-be gyi ma? <sup>8</sup> Næn-kæn cong ng-ts tu be tsah-be; ng-lah ziah feh be tsah-be, ziu feh-z ng-ts, z-go yia-cong.

<sup>4</sup> 尔拉抵挡罪恶，还旤得争到血出。<sup>5</sup> 并且是已经忘记所劝尔拉，像劝儿子介，就是话，「我个儿子，主责备尔，弗可轻易忽略；主批评尔，弗可脱力。<sup>6</sup> 因为主所爱惜个，总责备其；凡百所收留个儿子，总会打其。」[Ty. 3. 11, 12, LXX.] <sup>7</sup> 尔拉若耐心受责备，是神明待尔像儿子介。何里一个儿子，阿爹弗责备其吗？<sup>8</sup> 难间众儿子都被责备；尔拉若弗被责备，就弗是儿子，是个野种。

<sup>9</sup> Tsæ-wô, yiu nyüoh-sing-go ah-tia tsah-be ah-lah, jông-ts'ia we kying-djong gyi: 'o-hwông ling-sing-go Ah-tia, feh kæ keng-kô voh Gyi, hao teh-djôh weh-ming ma? <sup>10</sup> Keh-sing nyüoh-sing-go ah-tia tsiao zi-go i-s dzæn-z tsah-be ah-lah; dæn-z keh-we ling-sing-go Ah-tia z we-leh ah-lah-go ih-c'ü, iao ah-lah dô-kô teh-djôh Gyi-go sing-jün. <sup>11</sup> Ts-ü væn-pah-go tsah-be, be tsah-be z-'eo hao-ziang m-neh kw'a-lôh, tsih-yiu iu-meng; 'eo-deo z we kyih 'o-bing kong-yi-go ko-ts peh gyi sô lin-lin cü-kwu.

<sup>9</sup> 再话，有肉身个阿爹责备阿拉，尚且会敬重其。何况灵性个阿爹，弗该更加服其，好得着活命吗？<sup>10</sup> 箇星肉身个阿爹照自个意思暂时责备阿拉。但是箇位灵性个阿爹是为了阿拉个益处，要阿拉大家得着其个圣善。<sup>11</sup> 至于凡百个责备，被责备时候好像旤得快乐，只有忧闷；后头是会结和平公义个果子拨其所练练主顾。

<sup>12</sup> Sô-yi “m-lih-go siu, nyün-ziah-go kyiah-k’o-deo, yüong teng gyi ky’i-læ:” [Y. 35. 3.] <sup>13</sup> yüong <sup>[1]</sup>p’u-dzih gyi lu peh ng-lah-go kyiah hao tseo,” [Ty. 4. 26, LXX.] s-teh keh kwa-kyiah-go feh we tseo-ts’o, fæn-cün neng-keo i-hao. <sup>14</sup> Yüong zông-kying ky’i ‘o-moh cong-nying; yüong ken-kying ky’i tse-gyiu sing-jün; ziah feh-z sing-jün, m-nying neng-keo kyin Cü. <sup>15</sup> Yüong tông-sing kwu-djôh, k’ong-p’ô yiu nying <sup>[2]</sup>ts’o-lôh, feh neng-keo teh-djôh Jing-ming-go eng-we: k’ong-p’ô yiu ôh-doh-go keng-cü ts’iu-c’ih ngô læ, kao-ziao ng-lah, [K’en Sm. 29. 18.] s-teh hyü-to nying be gyi ta-le: <sup>16</sup> k’ong-p’ô? yiu soh-go ying-lön cü-kwu, ‘ôh-tsia vông-tsôh-vông-we-go, ziang Yi-sao ka; gyi we-leh ih-ts’æn væn m-diao zi tsiang-ts-go pe-veng. <sup>17</sup> Ng-lah yia hyiao-teh gyi ‘eo-deo iao-siang tsih-djôh tsiang-ts-go coh-foh, z be ky’i-diao: gyi se-tsih ngæn-li beh-c’ih iao gyiu <sup>[3]</sup>wæn-we-ts c’ü, cong-ü feh neng-keo.

<sup>12</sup> 所以「𠵼力个手，软弱个脚𠵼头，用敦其起来。」[Y. 35. 3.] <sup>13</sup> 用铺直<sup>[1]</sup>其路拨尔拉个脚好走」[Ty. 4. 26, LXX.]，使得箇拐脚个弗会走错，反转能够医好。<sup>14</sup> 用上紧去和睦众人；用赶紧去追求圣善；若弗是圣善，𠵼人能够见主。<sup>15</sup> 用当心顾着，恐怕有人错落，弗能够得着<sup>[2]</sup>神明个恩惠。恐怕有恶毒个根株抽出芽来，搅扰尔拉，[看 Sm. 29. 18.] 使得许多人被其带累。<sup>16</sup> 恐怕有啥个淫乱主顾，或者妄作妄为个，像以扫介；其为了一餐饭𠵼掉自长子个辈份。<sup>17</sup> 尔拉也晓得其后头要想接着长子个祝福，是被弃掉。其虽即眼泪浮出要求挽回之处<sup>[3]</sup>，终于弗能够。

[1] *Dông-deo wô*, dzih: ‘ôh-tsia \* fæn\*, bing; ‘ôh, wêng-tông. 荡头话，直。或者翻，并；或，直。（原注）

[2] ‘Ôh wô, shih-diao. 或话，失掉。（原注）

[3] *Peng-veng*, we-sing-cün-i-go u-sen. 本文，回心转意个乌碎。（原注）

<sup>18</sup> Ng-lah sô tseo-long-go, feh-z yiu ying-tsih go sæn, yiu ho-kwông, nyüong yüing, heh-en, gwông fong, <sup>19</sup> ‘ao-dong-go sing-hyang, teng yin-nyü-go sing-ing; t’ing-meng keh-go sing-ing cü-kwu tsih gyiu feh tsæ teng gyi kông. <sup>20</sup> (Ing-we *Jing-ming* sô feng-fu-go, “Ziu-z yia-siu bang-djôh keh-zo sæn, yia iao be zah-deo k’ang-sah, ‘ôh-tsia kong-tsin zih-sah,” [K’en C. 19. 13.] keh-go shih-wô gyi-lah tông-feh-djü: <sup>21</sup> ping-ts’ia sô k’en-kyin-go z ka ngwe-hyin, keh-lah Mo-si wô, “Ngô long-do ky’ih-hoh, hah-leh gwah-gwah-teo.”) <sup>22</sup> Dæn-z ng-lah yi-kying tseo-long Shing-sæn; keh-we weh Jing-ming-go dzing-ts, t’in-zông go Yiæ-lu-sah-leng; ts’in-væn-go t’in-s; <sup>23</sup> væn-pah tsiang-ts jü-long-go kyiao-we, gyi <sup>[1]</sup>ming-z sia læ t’in-zông go; sing-p’un cong-nying go Jing-ming; keh-sing djün-be-go tsing-dzih nying ling-

weng; <sup>24</sup> sing <sup>[2]</sup> iah-go Cong-pao, Yiæ-su; teng sô tsah-go hyüih, gyi-go shih-wô pi Üô-pah keng-kô hao.

<sup>18</sup> 尔拉所走拢个，弗是有形迹个山，有火光，浓云，黑暗，狂风，<sup>19</sup> 号筒个声响，等言语个声音；听闻箇个声音主顾只求弗再等其讲。<sup>20</sup> （因为神明所吩咐个，「就是野兽碰着箇座山，也要被石头揸煞，或者弓箭射煞」[看 C. 19. 13.]，箇个说话其拉当弗住。<sup>21</sup> 并且所看见个是介危险，箇拉摩西话，「我弄大吃惟，吓勒刮刮抖。」）<sup>22</sup> 但是尔拉已经走拢郇山；箇位活神明个城子，天上个耶路撒冷；千万个天使；<sup>23</sup> 凡百长子聚拢个教会，其名字写<sup>[1]</sup>来天上个；审判众人个神明；箇星全备个正直人灵魂；<sup>24</sup> 新约<sup>[2]</sup>个中保，耶稣；等所扎个血，其个说话比亚伯更加好。

[1] 'Ôh wô, zông-ts'ah-ts. 或话，上册子。（原注）

[2] Iah; yiu-teh fæn, yi-coh-go iah. 约；有得翻，遗嘱个约。（原注）

<sup>25</sup> Yüong kying-jing feh-k'ô ky'i-diao keh-we læ-tih kông-go. Ing-we læ di-'ô kông-go, keh-sing ky'i-diao Gyi cü-kwu jông-ts'ia bi-feh-ko; 'o-hwông dzong t'in-zông kông-go, ah-lah ziah feh ky'i ts'æ Gyi, dza neng-keo bi-leh-ko ni? <sup>26</sup> Keh-go z-'eo Gyi-go sing-ing cing-dong di: næn-kæn yiu ing-hyü, wô, "Tsæ z ih-tsao, Ngô fi-dæn cing-dong di, yia cing-dong t'in." [K'en Hk. 2. 6.] <sup>27</sup> Keh-kyü "tsæ z ih-tsao go shih-wô z ming-ming ts-tin keh-sing <sup>[1]</sup> be cing-dong-go tong-si, (kyi-jün z zao-c'ih-læ-go,) pih iao keng-kæ; s-teh keh-sing feh be cing-dong-go hao dziang læ-tong. <sup>28</sup> Sô-yi ah-lah kyi-jün tsih-ziu ih-go feh-k'ô cing-dong-go koh-veng, kæ <sup>[2]</sup> dzeng ken-eng-go sing; z-ka bao kong-kying p'ô-gyü ky'i voh-z Jing-ming, peh Gyi hwun-hyi: <sup>29</sup> ing-we ah-lah-go Jing-ming z "ziah læ-tih dziah-go mang-ho ka." [Sm. 4. 24: 9. 3.]

<sup>25</sup> 用谨慎弗可弃掉箇位来的讲个。因为来地下讲个，箇星弃掉其主顾尚且避弗过；何况从天上讲个，阿拉若弗去睬其，咋能够避勒过呢？<sup>26</sup> 箇个时候其个声音震动地。难间有应许，话，「再是一遭，我非但震动地，也震动天。」[看 Hk. 2. 6.] <sup>27</sup> 箇句「再是一遭」个说话是明明指点箇星被震动个<sup>[1]</sup>东西，（既然是造出来个，）必要更改；使得箇星弗被震动个好长来东。<sup>28</sup> 所以阿拉既然接受一个弗可震动个国份，该存感恩个心<sup>[2]</sup>；是介抱恭敬怕惧去服侍神明，拨其欢喜。<sup>29</sup> 因为阿拉个神明是「像来的着个猛火介。」[Sm. 4. 24: 9. 3.]

[1] 'Ôh wô, k'ô-yi cing-dong-go. 或话，可以震动个。（原注）

[2] 'Ôh wô, yiu eng-we; 'ôh, pô eng-we siu-leh-lao. 或话，有恩惠；或，把恩惠守勒牢。（原注）

## H. XIII.

KÆ z-djông ts'ing-æ hyüong-di. <sup>2</sup> Iao ing-gying tsih-dæ c'ih-meng-nying, feh-k'o mông-kyi: ing-we zin-deo yiu nying z-ka tso-fah, feh-cü-feh-kôh we tsih-dæ t'in-s. <sup>3</sup> Yüong kyî-nyiaen keh-sing be lin-diao so-djü-kæn-go, ziang ng-zi teng gyi dô-kô so-djü ka: kyî-nyiaen keh-sing ziu-næn-go, ing-we hyiao-teh ng-zi yia yiu ziu-næn-go kyî-sing. <sup>4</sup> Hweng-ing z-ken, cong-nying tu kæ k'en-djong; gyi min-zông yia kæ m-yüô-tin-go: ziah-z ying-lön teng kæn-ying-go cü-kwu, Jing-ming we p'un-tön gyi. <sup>5</sup> Tso-nying feh-k'o dzeng t'en-dzæ-go sing; sô yiu-go tong-si, kæ cü-tsoh; ing-we Jing-ming yiu ka wô, "Ngô feh we li-k'æ ng, yia feh we ky'i-diao ng:" [Is. 1. 5.] <sup>6</sup> sô-yi ah-lah hao fông-tæn wô, "CÛ z ngô-go pông-siu; ngô feh p'ô nying-kô dza dæ ngô." [S. 118. 6.]

该时常亲爱兄弟。<sup>2</sup> 要殷勤接待出门人，弗可忘记。因为前头有人是介做法，弗知弗觉会接待天使。<sup>3</sup> 用记念箇星被链条锁住间个，像尔自等其大家锁住介。记念箇星受难个，因为晓得尔自也有受难个肌身。<sup>4</sup> 婚姻事干，众人都该看重；其眠床也该旤瑕点个。若是淫乱等奸淫个主顾，神明会判断其。<sup>5</sup> 做人弗可存贪财个心；所有个东西，该知足。因为神明有介话，「我弗会离开尔，也弗会弃掉尔。」 [Is. 1. 5.] <sup>6</sup> 所以阿拉好放胆话，「主是我个帮手；我弗怕人家咋待我。」 [S. 118. 6.]

<sup>7</sup> Keh-sing yi-zin <sup>[1]</sup>ying-dao ng, djün Jing-ming-go dao-li peh ng t'ing go cü-kwu, yüong kyî-nyiaen gyi: ng-lah ts-si k'en gyi 'ang-i-dong-zing-go kwe-keng, yüong 'ôh gyi siang-sing-go yiang.

<sup>7</sup> 箇星以前引导尔<sup>[1]</sup>，传神明个道理拨尔听个主顾，用记念其。尔拉仔细看其行意动静个归根，用学其相信个样。

[1] 'Ôh wô, ng-lah li-hyang tso we-deo-we-nao go. 或话，尔拉里向做为头为脑个。（原注）

<sup>8</sup> Zin-deo, næn-kæn, tao shü-shü-dæ-dæ, Yia-su Kyi-toh z üong feh keng-kæ. <sup>9</sup> M-nao be keh-sing yiu-ho 'ao-su zia-kyiao yiao-dong: sing-li k'ao-djôh eng-we neng-keo kyin-kwu, z hao-go; feh-k'o k'ao-djôh ky'üoh-zih; ing-we liu-sing ky'üoh-zih go cü-kwu z vu-ih-go.

<sup>8</sup> 前头，难间，到世世代代，耶稣基督是永弗更改。<sup>9</sup> 旤得好被箇星有伙号数邪教摇动。心里靠着恩惠能够坚固，是好个；弗可靠着吃食。因为留心吃食个主顾是无益个。

<sup>10</sup> Ah-lah yiu ih-go tsi-dæn, gyi-go *li-veh* keh-sing tsiang-bong-li vong-z-go cü-kwu feh neng-keo ky'üoh gyi. <sup>11</sup> Keh-sing sang-k'eo gyi-go hyüih z tsi-s-deo sô ta-tsing sing-jün di-fông iao joh *nying-go* ze, gyi-go sing-t'i z læ ying-za-nga be *ho* mediao: <sup>12</sup> sô-yi Yiæ-su, iao pô Zi-go hyüih tseng-ky'i pah-sing, yia læ dzing-meng-nga ziu kw'u. <sup>13</sup> Ka-ni, ah-lah yia kæ tseo-c'ih ying-za-nga tao Gyi u-sen ky'i, *dzing-nyün* tæ-n-tông Gyi-go zôh-mô. <sup>14</sup> Ah-lah dông-deo m̃-teh dziang læ-tong-go dzing-ts, z tæ-n gyiu keh-zo tsiang-læ-go.

<sup>10</sup> 阿拉有一个祭坛，其个礼物箇星帐篷里奉侍个主顾弗能够吃其。<sup>11</sup> 箇星牲口其个血是祭司头所带进圣善地方要赎人个罪，其个身体是来营寨外被火焅掉。<sup>12</sup> 所以耶稣，要把自个血尊起百姓，也来城门外受苦。<sup>13</sup> 介呢，阿拉也该走出营寨外到其乌碎去，情愿担当其个警骂。<sup>14</sup> 阿拉荡头旤得长来东个城子，是单求箇座将来个。

<sup>15</sup> Sô-yi ah-lah kæ k'ao-djôh Yiæ-su pô tsæn-me-go tsi-veh z-k'eh hyin-zông peh Jing-ming, ziu-z *ah-lah* k'eo-li ken-zia Gyi ming-deo go ko-ts. <sup>16</sup> Ping-ts'ia ky'i 'ang hao-z tsiu-tsi *nying-kô*, feh-k'o mông-kyi: keh-cong-ka tsi-veh z Jing-ming sô hwun-hyi-go.

<sup>15</sup> 所以阿拉该靠着耶稣把赞美个祭物时刻献上拨神明，就是阿拉口里感谢其名头个果子。<sup>16</sup> 并且去行好事周济人家，弗可忘记。箇种介祭物是神明所欢喜个。

<sup>17</sup> Keh-sing <sup>[1]</sup>ying-dao ng go cü-kwu, z kying-sing kwu-djôh ng-go ling-weng, tsing-ziang tsiang-læ iao ky'i kao-dæ tsiang-moh ka, ng yüong i-jing gyi, deo-voh gyi; s-teh gyi hao hwun-hwun-hyi-hyi tso keh-go z-ken, hao-vong 'æ-sing-t'æn-ky'i: *ziah feh-z ka*, z ü ng-lah vu-ih.

<sup>17</sup> 箇星引导尔个主顾<sup>[1]</sup>，是警醒顾着尔个灵魂，正像将来要去交代账目介，尔用依顺其，投伏其；使得其好欢欢喜喜做箇个事干，好留嗜声叹气。若弗是介，是于尔拉无益。

[1] 'Ôh wô, ng-lah li-hyang tso we-deo-we-nao go. 或话，尔拉里向做为头为脑个。（原注）

<sup>16</sup> Yüong t'i ah-lah tao-kao: ing-we ah-lah ts'eng-ts'eng z dzeng-hao-go liang-sing, pô-feh-neng-keo væn-pah z-ken jing-kwe-dao-kyü tso-nying. <sup>19</sup> Ngô yü-kô hyüih-sing væn ng tao-kao, s-teh ngô hao soh-soh tsæ tao ng-lah-go u-sen læ.

<sup>18</sup> 用替阿拉祷告。因为阿拉忖忖是存好个良心，巴弗能够凡百事干循规蹈矩做人。<sup>19</sup> 我愈加血心烦尔祷告，使得我好速速再到尔拉个乌碎来。

<sup>20</sup> Næn-kæn keh-we bing-en-go Jing-ming, z pô ah-lah Cü Yiæ-su keh-we k'en-jiang-go do Moh-s, tsiao üong iah-go hyüih, dzong si-go cong-nyiang ta-zông-læ,—<sup>21</sup> dæn-nyün Gyi s-teh ng-lah *teh-ky'i* wun-djün *ky'i* 'ang ih-ts'ih-go jün-z, neng-keo tso-dzing Gyi-go ts-i, k'ao-djôh Yiæ-su Kyi-toh pô Gyi-zi sô hwun-hyi-go *sing-siang* dzeng læ ng-lah *sing-li*. Dæn-nyün yüong-wô shü-shü-dæ-dæ kwe peh Gyi. Üô-meng.

<sup>20</sup> 难间箇位平安个神明，是把阿拉主耶稣箇位看羊个大牧师，照永约个血，从死个中央带上来，——<sup>21</sup> 但愿其使得尔拉德气完全去行一切个善事，能够做成其个旨意，靠着耶稣基督把其自所欢喜个心想存来尔拉心里。但愿荣华世世代代归拨其。亚们。

<sup>22</sup> Hyüong-di, ngô z liah-liah sia liang-kyü peh ng; ts'ing ng-lah næ-sing t'ing ngô ky'ün-min-go shih-wô. <sup>23</sup> Ng hao hyiao-teh hyüong-di Di-mo-t'a yi-kying fông-c'ih: gyi ziah soh-tsih ziu tao, ngô we teng gyi dong-de læ kyin ng-lah. <sup>24</sup> Væn ng mông-mông cong-we ying-dao ng go cü-kwu teng cong sing-du. Keh-sing Yi-da-li *hyüong-di* tu mông-mông ng. <sup>25</sup> Dæn-nyün eng-we ling-djôh ng-lah cong-nying. Üô-meng.

<sup>22</sup> 兄弟，我是略略写两句拨尔；请尔拉耐心听我劝勉个说话。<sup>23</sup> 尔好晓得兄弟提摩太已经放出。其若速即就到，我会等其同队来见尔拉。<sup>24</sup> 烦尔望望众位引导尔个主顾等众圣徒。箇星以大利兄弟都望望尔。<sup>25</sup> 但愿恩惠临着尔拉众人。亚们。